



輿地廣記卷第二十

淮南東路

大都督府揚州春秋屬吳吳滅屬越越滅屬楚秦屬九江郡漢高帝六年為荊國十一年為吳國景帝曰江都國武帝曰廣陵國東漢為郡魏為重鎮後吳得之西晉屬廣陵郡東晉時以郗鑒都督青兗二州諸軍事鎮此宋置廣陵郡文帝兼置南兖州齊梁因之北齊改曰東廣州陳復曰南兖州後周改為吳州隋開皇九年改為揚州大業初置江都郡唐武德二年曰南兖州七年曰邳州以邳溝為名左傳所謂吳城邳溝以通江淮是也九年曰揚州天寶元年曰廣陵郡領淮南節度唐末楊行密竊據其地後為李昇所取今縣三

緊江都縣漢屬廣陵國東漢晉因之自梁至隋或廢或置隋為江都郡治唐為揚州有江水祠俗謂之伍相廟蓋本祭江神



而子胥配食耳

緊廣陵縣漢吳王濞所都後為江都廣陵國及郡治焉魏文帝征吳幸廣陵故城臨江觀兵歎曰天所以限南北也北齊置廣陵江陽二郡開皇初郡廢十八年改縣曰邗江大業初改曰江陽為江都郡治後省入江都唐正觀十八年復置與江都分治後改曰廣陵唐韓臯號知音常論廣陵散以為王凌母亡儉諸葛誕皆欲以揚州興兵正復魏室而不克魏由是散亡此說非也凌等為都督時揚州治壽春至隋始以廣陵為揚州治凌等起事與廣陵殊不相涉

望天長縣本千秋縣唐天寶元年析江都六合高郵置七載更名

望亳州春秋屬陳戰國屬宋秦屬碭郡漢屬沛郡東漢屬沛國兼為豫州刺史治焉魏置譙郡晉宋因之後魏亦曰譙郡兼立

南兗州後周改州曰亳州隋開皇初郡廢大業初州廢置譙郡唐初曰譙州貞觀八年更名亳州天寶元年復曰譙郡 皇朝大中祥符七年升集慶軍節度今縣七

望譙縣春秋陳邑漢屬沛郡魏武帝其邑人也置譙郡後周曰亳州置小黃縣及陳留郡隋開皇初郡廢大業二年改小黃曰譙縣唐因之

望城父縣春秋陳邑左傳楚昭王救陳師于城父是也漢屬沛郡東漢屬汝南郡晉屬譙郡後魏曰浚儀隋開皇十八年改曰城父屬亳州唐因之南有乾溪楚靈王敗于此

望蒙城縣本山桑縣漢屬沛郡東漢屬汝南郡晉屬譙郡後魏置譙州及渦陽縣兼置南譙郡梁改州曰西徐州東魏改曰譙州隋開皇初郡廢十六年改渦陽縣為肥水大業初州廢改肥水曰山桑屬譙郡唐屬亳州天寶元年改為蒙城蒙館

鎮本梁置北新安郡東魏改為蒙郡北齊郡廢置蒙縣後廢為鎮

望鄴縣顏師古云字本作鄜音曉中古以來皆借鄴字為之讀皆作鄜而莽呼為贄治則此縣亦有贄音二漢屬沛郡晉屬譙郡後廢隋開皇十六年復置屬譙郡唐屬亳州馬頭鎮本建平縣漢屬沛郡東漢省之後魏置馬頭郡北齊廢為鎮望永城縣本芒嶺二縣地二漢屬沛郡昭帝更嶺曰大丘光武更芒曰臨睢後皆省焉隋末置永城縣唐屬亳州芒縣故城在今縣北有芒山與碭山相接漢高帝隱於此大丘縣故城在今縣西北東漢陳寔為此縣長

望衛真縣本苦縣城東有賴鄉祠老子所生之地漢屬淮陽國東漢屬陳國晉屬梁國後魏為谷陽縣屬陳留郡北齊省之隋開皇六年復置屬亳州唐乾封元年改名真源載初元年

曰仙源神龍元年復曰真源 皇朝大中祥符七年改曰衛真

緊鹿邑縣本曰鳴鹿春秋晉邑左傳諸侯侵陳至于鳴鹿即此東漢置武平縣屬陳國晉屬梁國隋開皇十八年改為鹿邑屬淮陽郡唐屬亳州鄆城鎮本漢鄆縣屬沛郡東漢屬沛國晉省之

上宿州春秋戰國屬宋秦屬泗水郡漢屬沛郡東漢晉屬沛國梁置睢州北齊置睢南郡隋開皇初郡廢三年州廢屬徐泗亳三州唐因之元和四年析泗州之虹徐之符離蘄置宿州大和三年廢七年復置在徐州南界汴水上今縣五

望符離縣二漢晉屬沛郡北齊置睢南郡唐置宿州漢竹縣屬沛郡東漢為竹邑及晉皆屬沛國梁置睢州隋開皇三年廢竹邑入符離漢相縣為沛郡治東漢晉因之後廢故城在今

縣西北項羽破漢軍於靈璧東睢水為之不流即此縣界
望蘄縣本秦縣二世元年七月陳勝以戍卒起蘄即此二漢屬
沛郡西有會甄鄉高帝破黥布於此晉屬譙郡梁置蘄郡北
齊置仁州隋開皇初郡廢大業初州廢屬彭城郡唐屬宿州
漢龍亢縣屬沛郡東漢屬沛國晉屬譙郡北齊置龍亢郡隋
開皇初郡廢入蘄

緊臨渙縣本鉅縣漢屬沛郡東漢屬沛國晉屬譙郡後魏改為
臨渙屬臨渙郡北齊郡廢隋屬譙郡唐武德四年置北譙州
正觀十七年州廢屬亳州天祐四年來屬 皇朝大中祥
符七年復屬亳州天禧元年來屬有嵇山

中虹縣本埶夏二縣地漢皆屬沛郡東漢埶屬沛郡夏二屬
下邳國晉因之後皆廢焉北齊復置夏二縣及夏二郡兼置
潼州後周改州為宋州改縣為晉陵隋開皇初郡廢十八年

州廢縣復曰夏二屬泗州唐武德四年置仁州又析夏二置
虹縣六年省夏二正觀八年州廢以虹屬泗州元和四年來
屬

靈璧縣

緊楚州春秋屬吳戰國屬楚秦屬九江郡漢屬臨淮郡東漢屬
廣陵郡下邳國晉屬臨淮廣陵二郡東晉為重鎮元帝使劉隗
守淮陰是也安帝置山陽郡宋齊因之後魏置淮陰郡東魏改
為淮州隋開皇初山陽郡廢十二年置楚州大業初州廢屬江
都郡唐武德四年曰東楚州八年更名天寶元年曰淮陰郡今
縣四

望山陽縣本漢射陽縣屬臨淮郡東漢建武十五年封子荆為
山陽公治此十七年為王國後屬廣陵郡晉因之義熙七年
置山陽郡改射陽縣為山陽縣宋因之隋置楚州大業初州

廢屬江都郡隋末臧君相竊據之號東楚州唐武德四年君相降因之八年曰楚州

緊寶應縣本平安縣二漢屬廣陵國晉省之後置安宜縣隋屬江都郡唐武德四年以縣置倉州七年州廢來屬上元三年以獲定國寶十三枚因改元寶應兼改縣魏鄧艾築石鼉城在今縣西八十里以營田

上鹽城縣本漢鹽漬縣屬臨淮郡東漢晉屬廣陵郡後安帝改曰鹽城縣宋因之北齊置射陽郡陳改曰鹽城郡隋開皇初郡廢屬揚州隋末盜韋徹據其地置射州及射陽安樂新安三縣唐武德四年來歸因之七年州廢省三縣而置鹽城來屬

中淮陰縣漢屬臨淮郡韓信其邑人也今城東有漂母冢東漢屬下邳國晉為廣陵郡治後魏置淮陰郡東魏改為淮州北

齊置懷恩縣後周改曰壽張隋開皇初改曰淮陰大業初州廢省縣入山陽唐乾封二年復置屬楚州

上海州春秋戰國為魯東境後屬楚秦屬薛郡後分為郟郡漢改郟為東海郡東漢晉宋因之宋僑立青冀二州梁置南北二青州後入元魏東魏置海州隋開皇初郡廢大業初州廢為東海郡唐武德四年復曰海州天寶元年復曰東海郡今縣四緊胸山縣本胸縣二漢晉屬東海郡後魏置琅邪郡後周改縣曰胸山并胸山郡隋開皇初郡廢大業初置東海郡唐為海州秦始皇立石於胸縣海上以為秦之東門即此

中懷仁縣本祝其利城二縣地二漢晉屬東海郡後皆廢梁置南北二青州東魏州廢置義塘郡及懷仁縣隋開皇初郡廢屬海州唐武德四年置利城新樂二縣六年改新樂曰祝其八年省入懷仁有夾山春秋公會齊侯于夾谷傳謂之祝其

是也有羽山舜殛鯀於此

中沭陽縣本原丘縣地二漢晉屬東海郡後廢梁置潼陽郡東魏改曰沭陽郡及置懷文縣後周改縣曰沭陽隋開皇初郡廢屬海州唐武德四年置原丘縣八年省為鎮入沭陽

中東海縣本贛榆縣地漢屬琅邪郡東漢晉屬東海郡後廢後魏置東海郡及廣饒縣隋開皇初郡廢仁壽元年改廣饒曰東海屬海州唐武德四年置環州并置青山石城贛榆三縣八年州廢省三縣以東海來屬縣治鬱洲四面環海齊王田橫入海所保鬱洲也有郁州山一名蒼梧山俗傳此山在蒼梧徙來上有南方株木

上泰州春秋屬吳秦屬九江郡漢屬臨淮郡東漢晉屬廣陵郡安帝分置海陵郡宋齊因之隋開皇初郡廢屬江都郡唐武德三年置吳州七年州廢屬揚州五代吳楊氏置海陵制置院南

唐李氏升為泰州

皇朝因之後曰海陵郡今縣四

望海陵縣漢屬臨淮郡有吳大倉枚乘傳不如海陵之倉是也東漢省之晉復置屬廣陵郡安帝置海陵郡唐武德三年改縣曰吳陵置吳州七年州廢復故名吳置海陵制置院南唐為泰州

緊興化縣南唐置

中泰興縣南唐置

中下如臯縣晉安帝置寧海如臯二縣隋開皇初省如臯入寧海屬江都郡南唐復置

上泗州春秋屬徐戰國屬吳秦屬泗水郡漢屬臨淮郡東漢屬下邳國兼置徐州晉屬臨淮郡元魏置盱眙郡梁置高平郡又置濟陰郡隋開皇初郡皆廢屬揚泗濠三州唐屬楚泗濠三州今縣三

地二十一
緊盱眙縣漢為臨淮都尉治東漢屬下邳國晉為臨淮郡治明
帝兗州刺史劉遐自彭城退屯泗口即此安帝時置角城鎮
在淮泗之會後魏置盱眙郡陳置北譙州尋省隋開皇初郡
廢屬揚州唐武德四年置西楚州八年州廢屬楚州光宅初
改曰建中後復故名建中二年屬泗州後復屬楚州
皇朝乾德元年又屬泗州州徙治此有都梁山龜山禹治水
以鐵鎖鑱淮渦水神無支竒於龜山之足唐永泰中刺史李
湯以大牛五十引鎖出之鎖末有一青猿高五丈許復拽牛
沒水

上臨淮縣本漢下相僮二縣地屬臨淮郡東漢屬下邳國晉以
下屬臨淮郡而省僮縣後下相亦廢焉唐長安二年析徐城
南境置臨淮縣屬泗州開元二十五年州自宿預徙來治此
漢下相縣故城在今縣西北僮縣故城在西南徐城鎮本徐

國嬴姓有徐君墓季札掛劍之所漢屬臨淮郡東漢屬下邳
國晉屬臨淮郡梁置高平郡東魏置高平縣隋開皇初郡廢
十八年改縣曰徐城屬泗州唐因之 皇朝建隆二年省
為鎮入臨淮

上招信縣本淮陵縣地漢屬臨淮郡東漢屬下邳國晉屬臨淮
郡宋曰睢陵置濟陰郡後周改縣曰招義隋開皇初郡廢大
業初改縣曰化明屬鍾離郡隋末縣民馬簿盜據號化州唐
因之武德三年改縣曰招義正觀八年州廢屬濠州
皇朝乾德元年來屬太平興國元年更名

上滁州春秋屬吳戰國屬楚秦及二漢屬九江郡晉屬淮南郡
宋置新昌郡齊置南譙州北齊改郡為臨滁後周改曰北譙隋
開皇初郡皆廢改南譙州為滁州大業初州廢屬江都郡唐武
德二年復置天寶元年曰永陽郡今縣三

望清流縣本漢全椒縣地後魏置頓丘縣及新昌郡南譙州故城在今縣西南八十里北齊徙來治此隋開皇初改為滁洲廢郡為新昌縣十八年改曰清流大業初州廢屬江都郡唐置滁州周世宗征南唐李景使皇甫暉屯清流關為周師所敗暉被擒於此

望來安縣本永陽縣唐景龍三年析清流縣置屬滁州後改為來安

緊全椒縣二漢屬九江郡晉屬淮南國後廢梁置北譙縣及北譙郡北齊改縣曰臨滁後周復曰北譙隋開皇初郡廢改縣曰滁水大業初改為全椒屬江都郡唐屬滁州二漢阜陵縣屬九江郡明帝時淪為麻胡晉屬淮南郡後廢焉故城在今縣南

上真州自五代以前地理與揚州同南唐以永正縣地置迎鑾

鎮 皇朝乾德二年置建安軍大中祥符六年以聖像成功升為真州統縣二

中揚子縣唐永淳元年析江都縣置屬揚州後改為永正縣

皇朝於縣之迎鑾鎮置軍雍熙二年以永正為屬後復改為揚子屬真州

望六合縣本楚之棠邑伍尚為棠邑大夫是也漢屬臨淮郡東漢屬廣陵郡晉元康七年置堂邑郡安帝時改置秦郡後別置尉氏縣北齊兼置秦州後周改州曰方州改郡曰六合隋開皇初郡廢四年改尉氏為六合縣省堂邑入焉大業初州廢屬江都郡唐屬揚州 皇朝至道二年來屬有瓜步山

後魏太武南伐起行宮於瓜步山諸軍同日皆臨江即此

中通州自唐以前地理與秦州同南唐李氏置靜海制置院周顯德中世宗克淮南升為軍後以為通州 皇朝天聖元年

四百四十三 地理 地二
改曰崇州明道二年復故今縣二

望靜海縣本海陵之東境周顯德中置

望海門縣本海陵之東境周顯德中置

同下州高郵軍歷代地理與揚州同

郵軍熙寧五年廢元祐元年復置今縣一

望高郵縣漢屬廣陵國東漢屬廣陵郡吳省之晉武帝太康元

年復立屬臨淮郡末屬廣陵郡梁析置竹塘三歸二縣及置

廣業郡尋以有嘉禾改為神農郡隋開皇初郡廢又省竹塘

三歸臨潭三縣入焉屬江都郡唐屬揚州 皇朝置軍有

神居山

輿地廣記卷第二十

輿地廣記卷第二十一

淮南西路

緊壽州春秋戰國屬楚漢屬九江沛二郡東漢屬九江郡兼置
揚州魏晉宋齊梁屬淮南郡齊兼置豫州後魏曰揚州梁曰南
豫州東魏曰揚州陳曰豫州後周曰揚州隋屬汝陰淮南二郡
唐屬穎壽二州後唐天成三年升為忠正軍節度周顯德中自
壽春徙治潁州之下蔡 皇朝因之今縣五

緊下蔡縣故州來國為楚所滅左傳楚靈王狩于州來次于潁
尾地蓋在淮潁之會後吳取之以封季札至夫差時蔡成公
自新蔡徙此謂之下蔡秦相李斯其縣人也漢屬沛郡東漢
屬九江郡晉屬淮南郡梁置汴郡北齊郡廢隋屬汝陰郡唐
屬潁州周世宗伐南唐克壽春乃自壽春徙州治此有破石
山潁水淮水梁大同中於破石山築城拒東魏即縣城也

望安豐縣漢陽泉安風蓼三縣地屬六安國東漢屬廬江郡魏置安豐郡晉後魏梁陳皆因之隋開皇初郡廢屬壽州唐因之有芍陂楚相孫叔敖所造徑百里灌田萬頃魏太尉王凌與吳將張休文戰于芍陂即此有六國故城在縣南又有蓼國皆臯陶之後偃姓後項羽封黥布為九江王都六漢高帝元年別為衡山國五年屬淮南國文帝十六年復為衡山武帝元狩二年別為六安國治六而以蓼為屬東漢國廢以六蓼屬廬江郡晉省蓼而六屬廬江後省六入安豐陂中有大冢即臯陶冢楚人謂之公琴

望霍丘縣漢安豐松滋二縣地晉屬安豐郡後立霍丘成隋開皇十九年置霍丘縣屬壽州唐武德四年以松滋霍丘二縣置蓼州七年州廢來屬縣北有安豐津魏毋丘儉既敗藏水草中安豐津都尉部民張屬斬之即此松滋漢屬廬江郡晉

屬安豐郡唐省

緊壽春縣戰國時楚考烈王自陳徙都壽春命曰郢秦滅楚置九江郡漢高帝封子長為淮南王長子安謀反誅地入又為九江郡東漢因之為揚州刺史治魏王凌毋丘儉諸葛誕皆以揚州相繼起兵欲興魏室並為司馬氏所誅晉為淮南郡兼置揚州避鄭皇后諱改壽春曰壽陽後復曰壽春元魏因之隋改揚州曰壽州唐因之周世宗伐南唐劉仁贍固守不降世宗以其難克遂徙州治下蔡而復其軍曰忠正軍曰吾以旌仁贍之節也有八公山上有淮南王安廟圖安及八士像後晉謝元北禦符堅祈八公山及陳於淝水堅望見山上草木皆為旌旗之狀秦師遂敗

中六安縣本漢潛安豐二縣地晉永和十中謝尚鎮馬頭城在今縣北梁置霍州及岳安郡岳安縣北齊州廢隋開皇初郡廢

改縣為霍山屬廬州唐武德四年以霍山應城潛城三縣置霍州正觀元年州廢省應城潛城以霍山來屬神功元年曰武昌神龍元年復故名開元二十七年改為盛唐 皇朝開寶四年改為六安霍山鎮唐天寶初析盛唐別置霍山縣開寶元年省為鎮入盛唐有霍山有禹貢大別山潛本楚邑漢屬廬江郡東漢晉因之後省焉唐武德五年復置潛縣正觀中省入霍山有決水潛水

上廬州春秋屬舒戰國屬楚秦屬九江郡漢屬廬江九江二郡東漢因之曹公用劉馥為揚州刺史以合肥空城建立州治魏遂以為重鎮晉屬淮南廬江二郡梁置南豫州尋改曰合州隋開皇初改曰廬州大業初州廢唐長興二年升為昭順軍節度周顯德五年改為保信軍 皇朝因之今縣三
上合肥縣應劭曰夏水自城父東南至此與肥合故曰合肥二

漢屬九江郡魏以張遼守之吳孫權率眾十萬攻圍不克明帝時滿寵都督揚州諸軍鎮此於西北三十里築新城孫權欲圍之不敢下舡後諸葛恪圍新城亦失利而退晉屬淮南郡後廢焉梁置汝陰縣及汝陰郡隋開皇初郡廢為合肥置廬州唐因之有金牛山淝水淮水

中慎縣本浚道縣二漢屬九江郡故城在今縣南晉屬淮南郡後改為慎縣東魏置平梁郡陳曰梁郡隋開皇初郡廢屬廬州唐因之

下舒城縣古舒國偃姓後為楚所滅二漢舒縣為廬江郡治後廢焉唐開元二十三年析合肥廬江置舒城縣屬廬州有龍舒山龍舒水

望蘄州春秋戰國屬楚秦屬九江郡二漢屬江夏郡吳置蘄春郡晉廢屬弋陽郡北齊置雍州及齊昌郡後周改州曰蘄州隋

開皇初郡廢大業初州廢置蘄春郡唐武德四年曰蘄州天寶元年曰蘄春郡

皇朝因之今縣五

望蘄春縣二漢屬江夏郡吳置蘄春郡晉屬弋陽郡改縣曰蘄陽梁改曰蘄水北齊改曰齊昌郡隋開皇初郡廢置蘄州十八年縣復曰蘄春唐因之

望蘄水縣漢蘄春縣地宋置浠水縣及永安郡隋開皇初郡廢屬蘄州唐武德四年改縣曰蘭溪天寶元年改曰蘄水羅田縣

望廣濟縣唐武德四年析蘄春置永安縣天寶元年改名廣濟有積布山黃石山

望黃梅縣漢蘄春縣地晉元帝置新蔡郡及永安縣後郡廢隋開皇初改縣為新蔡十八年又改為黃梅屬蘄州有黃梅山上和州春秋屬吳戰國屬楚秦漢屬九江郡漢末揚州刺史自

壽春徙治此吳為重鎮晉屬淮南郡惠帝永興元年分置歷陽郡宋兼置南豫州齊梁皆因之北齊置和州隋開皇初郡廢大業初州廢復置歷陽郡唐武德三年改為和州天寶元年曰歷陽郡

皇朝因之今縣三

緊歷陽縣秦漢屬九江郡漢末為揚州治晉置歷陽郡宋置南豫州北齊置和州隋唐因之有歷湖

中舍山縣唐武德八年析歷陽置八年省長安四年復置更名武壽神龍元年復故名有濡湏水吳孫權築濡湏塢以拒曹公漢建安二十年公自圍之不克後黃武二年魏軍又攻之不拔

中烏江縣本秦東城縣之烏江亭項羽欲渡烏江即此二漢屬九江郡晉置烏江縣屬淮南郡梁置江都郡北齊改為齊江郡陳改為臨江郡後改為同江郡隋開皇初郡廢屬和州

上舒州春秋為皖國及羣舒地戰國屬楚秦屬九江郡二漢屬
廬江郡吳孫權克皖城遂為重鎮晉亦屬廬江郡安帝置晉熙
郡宋齊因之梁兼置豫州後改曰晉州北齊改曰江州陳又改
曰晉州隋開皇初郡廢置熙州大業初州廢置同安郡唐武德
四年改為舒州天寶元年復為同安郡 皇朝因之今縣五
上懷寧縣故皖國二漢為縣屬廬江郡漢末吳克皖城赤烏四
年諸葛恪屯之晉亦屬廬江郡後改皖縣為懷寧置晉熙郡
隋郡廢置熙州復置同安郡唐改為舒州有潛山一名天柱
山漢武帝嘗登

上桐城縣本漢樅陽縣屬廬江郡武帝自尋陽浮江薄樅陽而
出是也東漢省之梁復置及置樅陽郡隋開皇初郡廢屬熙
州十八年改縣曰同安唐屬舒州至德二載更名桐城有漢
朱邑祠有盛唐山樅陽水

上宿松縣本漢皖縣地梁置高塘郡隋開皇初郡廢置高塘縣
屬熙州十八年改縣曰宿松唐武德四年置嚴州八年州廢
來屬有長葛山雷水

上望江縣本漢皖縣地晉置新治縣陳置大雷郡隋開皇初郡
廢十一年改縣曰義鄉十八年又曰望江屬熙州唐武德四
年置高州尋改曰智州七年州廢屬嚴州八年州廢來屬
上太湖縣本漢皖縣地宋置太湖縣隋開皇初改曰晉熙後復
故名屬熙州唐屬舒州

上濠州本鍾離子國春秋時楚滅之以為縣吳又取之戰國復
屬楚秦及二漢屬九江郡晉屬淮南郡東晉置鍾離郡宋齊梁
因之齊兼置北徐州北齊改曰西楚州隋開皇初郡廢置濠州
大業初州廢置鍾離郡字初作豪唐元和三年改從濠天寶元
年復曰鍾離郡 皇朝因之今縣二

望鍾離縣故鍾離子國嬴姓後為楚邊邑楚平王時吳之邊邑
卑梁處女與鍾離小童爭桑兩家交怒相攻滅兩邑長又怒
而起兵相攻遂滅卑梁吳王聞之又怒使公子光伐楚拔鍾
離而還東晉置鍾離郡隋置濠州唐因之又後魏置當塗縣
及馬頭郡北齊改為馬頭縣置荆山郡隋開皇初郡廢改縣
曰塗山屬濠州唐武德七年省入鍾離有塗山禹之所娶也
有濠水莊子與惠子觀魚之所梁武帝堰淮水於鍾離以灌
壽陽即此

望定遠縣本漢東城縣屬九江郡項羽兵敗東城即此地東漢
因之晉屬淮南郡梁改東城曰定遠置臨濠郡北齊改郡曰
廣安隋開皇初郡廢屬濠州唐因之晉曰西曲陽屬淮南郡
北齊省入定遠

上光州春秋為黃弦二國皆為楚所滅戰國屬楚秦屬九江

郡二漢屬汝南江夏郡至魏分置弋陽郡晉宋齊梁因之兼置
光州後魏亦為弋陽郡北齊置南郢州後周置淮南郡隋開皇
初州郡俱廢大業初復置弋陽郡唐曰光州天寶元年曰弋陽
郡 皇朝因之今縣四

上定城縣故黃國也楚人滅之二漢為弋陽縣屬汝南郡故城
在今縣西魏置弋陽郡北齊置南郢州後廢為南北二弋陽
縣又省北弋陽入南弋陽改為定城縣後周又置淮南郡隋
初州郡俱廢後屬弋陽郡唐武德三年置弦州正觀元年州
廢屬光州太極元年州自光山徙來治此有黃水

望固始縣本滯上楚孫叔敖子所封之邑秦之滅楚蒙恬攻滯
即此漢為滯縣屬汝南郡光武更名固始晉屬汝陰郡梁置
蓼縣北齊復故名置北建州後周改為澮州隋開皇初州廢
後屬弋陽郡唐屬光州商城鎮本蔣國周公之後楚滅之以

爲期思縣漢屬汝南郡東漢因之晉屬弋陽郡後廢宋置包
信縣梁置義城郡及建州隋開皇初並廢改包信爲殷城屬
弋陽郡唐武德元年置義州正觀元年州廢來屬 皇朝
建隆元年改曰商城後省爲鎮入固始

中下光山縣故弦國楚人滅之漢爲西陽縣屬江夏郡晉爲弋
陽郡治梁置光州及光城郡隋開皇初郡廢置光山縣大業
初置弋陽郡唐爲光州太極元年州徙治定城

中下仙居縣本二漢軹縣地屬江夏郡故城今在縣北四十里
晉屬弋陽郡宋分軹縣置樂安縣梁置宋安郡隋開皇三年
郡廢後屬弋陽郡唐屬光州有僕僕先生居縣黃土山常餌
杏丹乘雲往來刺史李休光以爲妖叱左右執之龍虎見乎
側先生乘之而去天寶元年乃詔改樂安縣爲仙居

下黃州春秋戰國屬楚秦屬南郡二漢屬江夏郡晉初屬弋陽

郡後屬西陽郡宋因之齊分置齊安郡北齊兼置衡州後周因
之隋開皇初郡廢改衡州曰黃州大業初州廢置永安郡唐武
德三年復爲黃州天寶元年復曰齊安郡 皇朝因之今縣

三

望黃岡縣本漢西陵縣地屬江夏郡晉屬弋陽郡後屬西陽國
北齊置南安縣及齊安郡隋開皇初郡廢改縣曰黃岡置黃
州大業初置永安郡唐復曰黃州邾縣故城在今縣東南一
百三十里楚宣王滅邾徙之於此故曰邾項羽封吳芮爲衡
山王都此漢屬江夏郡東漢因之晉屬弋陽郡後廢東晉毛
寶守邾城爲石季龍所敗有卒投江水遇白龜之救

上黃陂縣本漢西陵縣地北齊置南司州後周置黃陂縣改南
司州曰黃州隋開皇初移州治黃岡縣唐武德三年置南司
州七年州廢來屬

中麻城縣本漢西陵縣地梁置信安縣陳置定州後周改曰亭州隋開皇初郡廢十八年改縣曰麻城屬黃州唐武德三年置亭州八年州廢來屬

同下州無為軍自五代以前地理與廬州同 皇朝太平興國三年以巢縣之無為鎮置無為軍今縣三

望無為縣漢襄安縣地屬江郡東漢晉因之梁改曰蘄縣隋開皇初復改爲襄安屬廬江郡後併入巢縣置無為鎮 皇朝太平興國三年以鎮置無為軍熙寧三年析巢廬江二縣置無為縣

望巢縣古曰南巢成湯放桀於此周初巢伯來朝春秋爲羣舒邑叛楚故楚人圍巢二漢爲居巢縣屬廬江郡晉因之隋曰襄安縣唐武德三年置巢州七年州廢改襄安爲巢縣屬廬州 皇朝太平興國三年來屬有巢湖在縣東南

望廬江縣本漢龍舒縣地屬廬江郡東漢晉因之齊改曰廬江縣置廬江郡梁置湖州北齊州廢隋開皇初郡廢屬廬州唐因之 皇朝太平興國三年來屬

郡東漢省之晉復置屬吳郡陳置錢塘郡隋平陳郡廢自餘
杭徙州治此後曰餘杭郡唐復曰杭州晉天福中避高祖名
改錢塘曰錢江 皇朝太平興國四年改曰仁和有臨平
湖傳言此湖塞天下亂此湖開天下平吳孫皓天璽元年吳
郡言臨平湖自漢末穢塞今更開通斯晉氏平吳一天下之
符也

望餘杭縣秦始皇南游至錢塘臨浙江水波惡乃西百二十里
從狹中渡因置餘杭縣漢屬會稽郡東漢晉屬吳郡隋置杭
州後州徙治錢塘唐屬杭州有由拳山

望臨安縣本漢餘杭縣地吳孫權分置臨水縣屬潛州八年省入於
屬吳郡後廢唐武德七年復置臨水縣屬潛州八年省入於
潛垂拱四年析餘杭於潛以故臨水城復置臨安縣屬杭州
吳越王錢鏐其縣人也鏐既貴以素所居營為安國衣錦軍

鏐歸宴故老山林皆覆以錦梁改臨安縣曰安國縣以尊之
皇朝太平興國三年復曰臨安

緊富陽縣本富春縣漢屬會稽郡東漢屬吳郡吳王孫權其縣
人也置東安郡晉皇后名春孝武改曰富陽屬吳郡隋屬餘
杭郡唐屬杭州

緊於潛縣二漢屬丹陽郡晉屬吳興郡隋屬餘杭郡唐屬杭州
北有天目山

上新城縣本富春縣地晉咸和中置新城縣隋平陳省入錢塘
後復置唐武德七年省入富陽永淳元年復置屬杭州梁改
曰新登 皇朝太平興國四年復改曰新城有桐溪

上鹽官縣本漢海鹽縣地吳王濞煮海為鹽蓋在此有鹽官吳
因置鹽官縣晉屬吳郡隋屬餘杭郡唐屬杭州

中昌化縣本於潛縣地唐垂拱二年析置紫溪縣萬歲通天元

年曰武隆縣皆屬杭州神龍元年更武隆為唐山縣大麻二年皆省長慶初復置唐山梁改曰金昌後唐同光初復故名

晉改為橫山

皇朝太平興國四年改曰昌化有百丈山紫溪水所出東南流逕新城謂之桐溪又逕桐廬入浙江

大都督越州春秋為越國之都周顯王時越王無彊西伐楚楚威王興兵大敗之盡取故吳地至浙江而越以此散服朝於楚秦屬會稽郡漢因之東漢置會稽郡乃自吳縣徙治山陰晉宋齊梁陳皆因之宋兼置東揚州尋廢梁復置東揚州隋平陳郡廢改州曰吳州大業初置越州尋廢置會稽郡唐復為越州天寶元年曰會稽郡升為鎮東軍 皇朝因之統縣八

望會稽縣本於越地禹會諸侯江南計功而崩因葬焉命曰會稽會稽者會計也其後帝少康封庶子杼於會稽以奉守禹祀即越王允常之先也秦置山陰縣屬會稽郡漢因之東漢

順帝以後為郡治晉因之後分置會稽縣隋為吳州越州及會稽郡治唐因之南有會稽山秦始皇於此刻石紀功有禹冢禹穴有秦望山在州城正南為眾峯之傑始皇登之以望東海山南有嵯峴峴有大城越之先君無餘舊都于此有鏡湖若耶溪雷門

望陰山縣秦漢以來故縣隋平陳省入會稽縣唐垂拱二年復置在州郭下與會稽分治有鑑湖東漢永和五年太守馬臻所創開周回三百餘里溉田九千餘頃創湖之始多浸冢墓有千餘人怨訴臻因被刑於市及遣使覆按摠不見人籍乃知死者所訴也有龜山一名怪山一名自來山本自琅琊東武飛來於此其形似龜故名有蘭溪溪口有亭曰蘭亭晉太守王羲之作曲水序於此

望剡縣漢屬會稽郡東漢晉隋皆因之唐武德四年平李子通

置嵎州六年州廢來屬有天姥山

望諸暨縣本曰句無越王允常之故邑國語所謂南至句無是也漢為諸暨縣屬會稽郡東漢晉隋皆因之唐屬越州

望餘姚縣二漢晉皆屬會稽郡隋省入句章縣有句餘山在餘姚南句章北故二縣因以為名唐武德四年復置及置姚州七年廢屬越州

緊蕭山縣本餘暨縣二漢屬會稽郡漢末童謠曰天子當興東南三餘之間故孫權改曰永興縣晉因之隋省入會稽縣唐儀鳳二年復置屬越州天寶元年改曰蕭山縣有蕭山潘水所出水經以為疑是浦陽江之別名自外無水以應之越人西施出於此縣

緊新昌縣本剡縣地五代時置新昌縣屬越州有沃州水

望平江府周初封太伯為吳國春秋末為越所併戰國屬楚秦

置會稽郡漢因之東漢順帝置吳郡晉宋齊梁陳皆因之陳兼置吳州隋平陳郡廢改州曰蘇州因姑蘇山為名大業初州廢復置吳郡唐武德四年曰蘇州天寶元年曰吳郡南唐升為中吳軍節度 皇朝太平興國三年改曰平江軍政和三年升為平江府今縣五

望吳縣本曰句吳太伯避公季奔荆蠻荆蠻歸之號曰句吳武王克商因封之至夫差為越所滅後越破更屬楚秦置會稽郡項梁初起吳中使項籍斬會稽守殷通即此地漢高帝以封吳王濞後國除復為會稽郡東漢順帝分置吳郡隋曰蘇州唐因之有姑蘇山虎丘山即吳王闔廬墓也太湖中有苞山亦曰夫椒山左傳吳伐越敗之夫椒是也山有洞室入地潛行北通瑯耶東武俗謂之洞庭

望長洲縣吳有長洲苑在東漢枚乘諫吳王不如長洲之苑即

此唐方歲通天元年析吳置長洲縣在州郭與吳分治
望崑山縣本漢婁縣地屬會稽郡東漢晉屬吳郡陸機陸雲生
於此故名其山曰崑山梁置崑山縣隋平陳省之開皇十八
年復置屬吳郡唐屬蘇州

望常熟縣本漢吳縣地晉分置海虞縣屬吳郡梁分置南沙常
熟二縣隋平陳徙常熟於南沙而省海虞入焉屬蘇州唐因
之有常熟山

緊吳江縣朱梁開平三年吳越錢鏐奏於松江置吳江上承太
湖更逕笠澤國語曰越伐吳吳禦之笠澤是也

望潤州春秋屬吳戰國屬越後屬楚秦屬會稽鄞二郡漢高帝
以封荆王劉賈後屬會稽郡東漢屬吳郡吳王孫權初鎮丹徒
謂之京城晉平吳置毗陵郡宋置南東海郡及南徐州梁改郡
曰南蘭陵郡陳曰南東海郡自宋至陳常以京口為重鎮隋平

陳郡廢開皇十五年置潤州大業初州廢屬江都郡唐武德三
年復置潤州天寶元年改為丹陽郡後升鎮海軍節度 皇朝
改鎮江軍今縣三

緊丹徒縣春秋時謂之朱方齊慶封奔吳予之朱方是也秦時
望雲者言其地有天子氣乃使赭衣徒三千人鑿長坑以敗
其勢故曰丹徒漢屬會稽郡東漢屬吳郡孫權鎮此曰京城
晉置毗陵郡宋置南東海郡及南徐州隋開皇九年置延陵
縣省丹徒入焉置潤州以潤浦為名唐因之武德三年以故
延陵縣地復置丹徒縣有北固山金山

緊丹陽縣古雲陽秦始皇改為曲阿漢屬會稽郡東漢屬吳郡
晉屬毗陵郡隋屬江都郡唐武德三年置雲州五年曰簡州
八年州廢來屬天寶元年改為丹陽延陵鎮本曲阿縣地唐
武德三年以延陵縣地置丹徒乃別置延陵縣於今所屬茅

州七年州廢屬蔣州九年來屬

皇朝熙寧五年省入丹

陽
緊金壇縣本曲阿縣地隋末盜起土人保聚因為金山縣唐屬蔣州武德八年省入延陵垂拱四年復置來屬更名金壇有茅山

上湖州春秋屬吳吳滅屬越戰國屬楚秦屬會稽鄣二郡漢屬會稽丹陽二郡東漢屬吳郡吳孫皓分置吳興郡晉宋齊梁陳因之梁兼置震州隋開皇九年平陳郡廢仁壽中置湖州大業初州廢屬餘杭吳二郡唐武德四年復置湖州天寶元年復曰吳興郡周升為宣德軍節度 皇朝景祐元年改昭慶軍今縣六

望烏程縣漢屬會稽郡東漢屬吳郡吳置吳興郡梁置震州隋置湖州唐因之有太湖禹貢震澤也周官謂之具區有苕溪

雲溪入焉有卞山衡山左傳吳伐楚至于衡山即此

望歸安縣本烏程縣地

皇朝太平興國七年析置歸安縣

於郭下與烏程分治

望安吉縣本漢故鄣縣地吳興記曰光和末張角亂此鄉守險助國漢嘉之中平二年分故鄣之南鄉置安吉縣屬丹陽郡晉屬吳興郡梁陳屬陳留郡隋平陳郡廢省安吉入綏安義寧二年沈法興復置唐武德四年賊平因之屬姚州七年省入長城麟德元年復置屬湖州

望長興縣本烏程故鄣二縣地吳王闔閭使弟夫概居此築城狹而長晉武帝因置長城縣屬吳興郡隋平陳省之仁壽中復置屬吳郡唐武德四年更置綏州因故綏安縣為名又改曰雒州七年州廢來屬梁避廟諱改曰長興秦鄣郡故城在縣西南八十里二漢為故鄣縣屬丹陽郡晉屬吳興郡梁陳

屬陳留郡隋省入綏安俗號為府頭

緊德清縣本武康縣地唐天授元年分置武原縣景雲二年改為臨溪天寶元年改為德清

上武康縣本防風氏之國漢為烏程縣之餘不鄉漢童謠言天子當興東南三餘之間吳乃分餘不鄉置永安縣晉以平陽已有永安故改此永安為永康又改曰武康屬吳興郡隋屬餘杭郡大業末李子通置安州又曰武州唐武德四年賊平因之七年州廢來屬梁屬杭州 皇朝太平興國四年復來屬有封嵎山餘不溪

上婺州春秋戰國皆屬越秦屬會稽郡二漢因之吳孫皓分置東陽郡晉宋齊因之梁置金華郡陳因之隋平陳郡廢置婺州以當天文婺女之分為名大業初州廢復置東陽郡唐武德四年置婺州天寶元年曰東陽郡石晉升武勝軍節度 皇朝淳

化元年改寶寧軍今縣七

望金華縣本漢烏傷縣地屬會稽郡初平三年分縣南鄉置長山縣吳為東陽郡治晉以後因之或云本曰長仙赤松子采藥此山因而居之故以為名後傳呼乖訛字亦隨改梁置金華郡隋開皇中郡廢置婺州改長山縣為吳寧十二年改曰東陽十八年又改曰金華大業初復置東陽郡唐復曰婺州有金華山赤松澗

望東陽縣本漢烏傷縣地唐垂拱二年分義烏置屬婺州有峴山

望義烏縣本二漢烏傷縣屬會稽郡異苑曰東陽顏烏以淳孝著聞父死負土成墳羣鳥嚙土助焉而口皆傷因以名縣自晉至隋皆屬東陽郡唐武德七年改烏傷為義烏有靈黃山望蘭溪縣本金華縣地唐咸亨五年分縣西界置屬婺州有九

峯山

緊永康縣吳赤烏中分烏傷縣上浦置自晉至隋皆屬東陽郡

唐武德四年置麗州八年州廢來屬有石城山

上武義縣吳赤烏八年置後廢唐天授二年分永康復置屬婺州後改曰武成天祐中復曰武義有八素山

上浦江縣唐天寶十三載分義烏蘭溪及杭州富陽置浦陽縣屬婺州後改爲浦江

輿地廣記卷第二十三

兩浙路下

上明州秦屬會稽郡漢已降因之唐開元二十六年採訪使齊澣奏以越州之鄞縣置以境有四明山爲名天寶元年曰餘姚郡朱梁升爲望海軍節度 皇朝建隆二年改奉國軍今縣六

望鄞縣本漢鄞縣屬會稽郡東漢晉宋皆因之隋平陳省入句章屬會稽郡唐武德四年以句章縣置鄞州八年州廢更置鄞縣屬越州開元中置明州五代時改曰鄞縣有四明山鄞縣故城在今縣東南漢屬會稽郡東漢及晉宋皆因之隋平陳省入句章句章縣漢屬會稽郡東漢晉宋隋皆因之唐省入鄞縣故城在今縣西

望奉化縣本漢鄞縣地唐開元二十六年分鄞縣置屬明州有

鎮亭山

上慈溪縣本漢句章縣地唐開元二十六年分鄞縣置屬明州有句餘州

上定海縣本望海縣朱梁開平三年吳越錢鏐奏置屬明州後改曰定海有大浹江越滅吳欲遷吳王夫差於甬東韋昭以為句章東浹口外洲是也

下象山縣本漢鄞縣地唐神龍二年分寧海鄞二縣置屬台州廣德二年來屬有東門山即漢志所謂越天門山也

下昌國縣 皇朝熙寧六年析鄞縣置有雲霄山

望常州春秋屬吳戰國屬越後屬楚秦漢屬會稽郡東漢屬吳郡吳分會稽之無錫以西為屯田置典農校尉晉太康二年省校尉屬毗陵郡惠帝以東海王越世子名毗改曰晉陵郡宋齊梁陳因之隋平陳郡廢置常州大業初州廢置毗陵郡唐武德

三年復置屬常州天寶元年曰晉陵郡後復曰毗陵 皇朝因之今縣五

望晉陵縣本延陵吳季札居之漢曰毗陵縣屬會稽郡東漢屬

吳郡晉屬毗陵郡後郡縣俱改為晉陵隋初曰常州後曰毗

陵郡唐因之有橫山有季札墓在縣北七十里漳浦之西

望武進縣本漢曲阿縣地晉分丹徒曲阿置屬毗陵郡梁改曰

蘭溪屬南蘭陵郡隋省入曲阿屬江都郡唐垂拱二年復置於州城內與晉陵分治

望無錫縣吳太伯始所居地名句吳後楚春申君城故吳墟以

自為都邑漢為無錫縣屬會稽郡東漢屬吳郡吳省晉太康

元年復置屬毗陵郡宋以後屬晉陵郡隋屬毗陵郡唐屬常

州有慧山

望宜興縣本陽羨縣漢屬會稽郡東漢屬吳郡吳屬吳興郡晉

惠帝以周玘創義討石水分陽羨置義興郡以表其功宋齊梁陳因之隋平陳郡廢改陽羨縣為義興屬常州唐武德七年置南興州八年州廢來屬 皇朝太平興國元年改曰宜興

望江陰縣梁分蘭陵縣置及置江陰郡隋平陳郡廢屬常州唐武德三年置暨州九年州廢來屬南唐置江陰軍 皇朝淳化元年軍廢來屬三年復置軍熙寧四年又廢來屬上温州春秋屬越秦二漢屬會稽郡吳屬臨海郡晉明帝置永嘉郡宋齊梁陳因之隋平陳郡廢屬處州大業初屬永嘉郡唐武德五年置東嘉州正觀元年州廢屬括州上元二年置温州天寶元年曰永嘉郡石晉升靜海軍節度 皇朝太平興國二年降軍事今縣四

緊永嘉縣本東甌國漢惠帝立閩君搖為東海王都東甌世號

曰東甌王後世為閩越所攻東甌舉國徙江淮之間東漢永和三年以章安縣之東甌鄉置永寧縣屬會稽郡吳屬臨海郡晉宋為永嘉郡治隋平陳郡廢改縣為永嘉唐為温州望平陽縣本橫陽縣晉太康四年置曰始陽後改名宋因之後省唐武德五年分安同縣復置屬東嘉州正觀元年省大足元年復置屬温州朱梁改曰平陽有橫陽山

緊瑞安縣本東漢章安縣地吳置羅陽縣又改曰安陽晉改為安國屬臨海郡宋因之隋省焉唐武德五年析永嘉縣復置屬東嘉州正觀元年屬括州上元二年屬温州五代時改曰瑞安

上樂清縣本樂城縣晉孝武分永寧縣置屬永嘉郡宋因之後省入永嘉縣唐武德五年復置屬東嘉州七年又省載初元年復置屬温州五代時改曰樂清有鴈蕩山芙蓉山

上台州春秋戰國屬越秦屬會稽郡漢屬東甌國後屬會稽郡東漢因之吳置臨海郡晉宋齊梁陳因之隋平陳郡廢屬處州後屬永嘉郡唐武德四年置海州五年改爲台州天寶元年曰臨海郡 皇朝因之今縣五

望臨海縣本漢回浦屬會稽郡東漢改曰章安吳分章安置臨海縣屬臨海郡晉宋因之後省入章安隋平陳郡廢改章安曰臨海屬處州後屬永嘉郡唐武德四年置海州復置章安縣五年改曰台州八年省章安有括蒼山天姥山

望黃巖縣本永寧縣唐上元二年分臨海置屬台州天授元年更名有黃巖山

緊寧海縣本漢剡縣地晉爲寧海縣屬臨海郡宋因之後省唐武德四年析臨海復置屬海州七年省入章安永昌元年復置台州有桐栢山

上天台縣吳置始平縣晉太康元年改曰始豐屬臨海郡宋因之後省唐武德四年析臨海縣復置屬海州八年省正觀八年復置上元二年改爲唐興朱梁改爲天台後唐復故石晉改爲台興 皇朝建隆元年復改曰天台有天台山赤城山

上仙居縣本樂安縣晉永和三年分始豐縣南鄉置宋因之後省唐武德四年析臨海置屬海州八年省上元二年復置屬台州五代時改爲永安 皇朝景德四年改爲仙居

上處州春秋戰國屬越秦屬會稽郡漢爲東甌國地後屬會稽郡東漢因之吳置臨海郡晉屬永嘉郡宋以後因之隋開皇九年平陳置處州十二年改爲括州大業初州廢置永嘉郡唐武德四年復置括州天寶元年改曰縉雲郡大歷四年避德宗名改爲處州 皇朝因之今縣五

望麗水縣本漢章安縣地隋平陳分松陽縣東界置括蒼縣及
處州又改曰括州州廢置永嘉郡唐曰括州大歷十四年改
曰處州縣曰麗水有括蒼山
望龍泉縣本遂昌松陽二縣地唐乾元二年析置龍泉縣有豫
章山龍泉湖

上松陽縣吳置屬臨海郡晉因之宋屬永嘉郡隋平陳郡廢屬
處州唐因之朱梁時楊氏據江淮於是吳越錢氏上言以淮
寇未平恥聞逆姓請改為長松後又改曰白龍 皇朝咸
平二年復曰松陽

上遂昌縣本漢太末縣地吳赤烏二年置平昌縣晉太康元年
改為遂昌屬東陽郡宋因之後省而復置唐武德八年又省
入松陽景雲二年復置屬括州

上縉雲縣本括蒼縣地唐方歲登封元年置屬括州有縉雲

山有好溪本名惡溪多水怪唐大中中刺史段成式有善政
怪族自去因改曰好溪

中青田縣本括蒼縣地唐景雲二年置屬括州有石門山宋謝
靈運所遊有題詩有青田溪永嘉記曰青田有雙白鶴年年
生子長便去

上衢州自隋以前地理與婺州同唐武德四年平李子通析婺
州之信安置衢州以州西三衢山為名七年陷輔公祐乃廢垂
拱二年復置天寶元年曰信安郡 皇朝因之今縣五

望西安縣本漢太末縣地東漢初平三年析置新安縣屬會稽
郡晉太康元年改曰信安屬東陽郡宋至隋皆因之唐置衢
州咸通中改曰西安故定陽縣漢末孫氏分新安置晉屬東
陽郡宋因之後省唐武德四年析信安復置六年省之故盈
川縣唐如意元年析龍丘置元和七年省入信安有石室山

晉民王質伐木至石室中見童子四人彈琴而歌質倚斧柯聽之俄頃而去斧柯爛盡既歸已數十年親戚凋落無復向時矣

緊江山縣本湏江縣唐武德四年析信安置屬衢州八年省永昌元年復置五代時改為江山有江郎山通典謂之湏郎山發地如笋有三峯焉

上龍遊縣本姑蔑越之西部也秦為太末縣屬會稽郡二漢因之晉宋以後屬東陽郡隋平陳省入金華唐武德四年復置太末縣及穀州八年州廢省縣入信安正觀八年復置更名龍丘屬婺州五代時改為龍遊有龍丘山穀水

中常山縣本信安縣地唐咸亨五年置常山縣屬婺州垂拱二年來屬乾元元年屬信州後復故有常山

中開化縣本常山縣地

皇朝乾德四年置開化場太平興

國六年升為縣

上睦州春秋戰國屬越後屬楚秦屬會稽鄣二郡漢屬會稽丹陽二郡東漢屬丹陽吳二郡梁置新安郡隋平陳郡廢仁壽二年置睦州大業初州廢置遂安郡唐武德四年改為睦州天寶元年曰新定郡 皇朝因之今縣六

望建德縣本漢富陽縣地屬會稽郡吳置建德縣屬吳郡晉宋因之隋省入吳寧唐武德四年復置屬睦州七年省入桐廬雉山永淳二年復置萬歲通天二年州自雉山移治於此

望青溪縣漢歙縣地屬丹陽郡梁置新安郡及新安縣隋平陳郡廢大業初改為雉山縣置遂安郡唐武德四年置睦州文明元年復為新安萬歲通天二年州徙治建德開元二十年改為還淳永正元年改曰青溪有雉山

上桐廬縣漢富春縣地吳分置屬吳郡晉宋因之隋平陳縣廢

仁壽中復置屬睦州唐武德四年置嚴州七年州廢來屬有嚴陵山嚴陵瀨即嚴子陵之所居也

中分水縣本桐廬縣地唐武德四年置屬嚴州七年省如意元年復置更名武盛屬睦州神龍元年復故名

中遂安縣本漢歙縣地吳分置新定縣屬新安郡晉太康元年改名遂安宋因之隋平陳縣廢仁壽中復置屬睦州唐因之有白石英山

中壽昌縣本雉山縣地唐永昌元年分置屬睦州載初元年省神龍元年復置

上秀州春秋時吳越分境於此吳亡屬越越敗屬楚秦屬會稽郡漢因之東漢晉宋屬吳郡隋唐屬蘇州後屬杭州石晉時吳越錢氏奏置秀州 皇朝因之今縣四

望嘉興縣故攜李地吳之南境春秋吳伐越越子陳于攜李即

此秦爲長水縣望氣者去有天子氣始皇乃令囚徒十萬人掘汙其地表以惡名改曰囚拳縣後曰由拳漢屬會稽郡東漢屬吳郡吳黃龍四年由拳有嘉禾生改爲禾興後太子諱和改爲嘉興晉宋因之後省焉唐武德七年復置屬蘇州八年省入吳縣正觀八年復置五代屬杭州吳越王錢元瓘奏置秀州有胥山

緊華亭縣本崑山縣地唐天寶中置屬蘇州後屬秀州有華亭谷水有崑山吳陸氏之先葬此後機雲兄弟有辭學時人以玉出崑崗因名之有機雲宅在谷中後機臨刑歎曰華亭鶴唳可得聞乎

上海鹽縣故武原鄉越地也秦置海鹽縣屬會稽郡漢因之東漢屬吳郡順帝時縣淪陷爲湖今當湖是也大旱湖竭城郭猶可識後乃移治今所晉宋因之後省焉唐景雲二年分嘉

輿地廣記卷第二十三
興復置屬蘇州先天元年省開元五年復置後屬秀州
中崇德縣有語兒水本曰禦兒越之北境越語云勾踐之地北
至禦兒即此

輿地廣記卷第二十三

輿地廣記卷第二十四

江南東路

次府江寧府春秋屬吳戰國屬越後屬楚秦屬鄣郡二漢屬丹
陽郡吳王孫權初鎮丹徒謂之京城後徙都秣陵改為建業晉
平吳以為丹陽郡及揚州刺史治東晉元帝渡江復都焉改丹
陽太守為尹宋齊梁陳因之常以京口為重鎮隋平陳郡廢夷
蕩耕墾更於石頭城置蔣州大業初復置丹陽郡唐武德三年
置揚州七年平輔公祐復改為蔣州八年又改為揚州九年州
徙治江都以其地屬潤州至德二載析置江寧郡乾元元年曰
昇州上元三年州廢光啓三年復置五代時南唐李氏竊據升
為江寧府 皇朝開寶八年克復降為昇州天禧二年復升
江寧府建康軍節度今縣五
次赤上元縣本楚邑楚威王以其地有王氣埋金以鎮之故曰

金陵秦改曰秣陵二漢屬丹陽郡吳建安十六年改曰建業
因都焉晉武帝平吳復曰秣陵本治去京邑六十里故治村
是也安帝義興九年移治京邑宋齊梁陳因之隋平陳省秣
陵入江寧縣置蔣州唐武德三年改江寧曰歸化屬揚州八
年改歸化曰金陵九年改金陵曰白下屬潤州正觀九年復
改白下曰江寧肅宗上元二年改曰上元乾元元年置昇州
南唐置江寧府故建康縣本建鄴晉武帝既復改建業為秣
陵太康三年又分秣陵之水北置建鄴縣後避愍帝名改曰
建康隋省入江寧湖熟鎮本湖熟縣二漢晉宋屬丹陽郡後
省入焉有蔣山石頭城六朝以為重鎮

次赤江寧縣晉武太康元年分秣陵置臨江縣二年更名唐既
改江寧為上元南唐復析上元置江寧分治郭下

次畿句容縣二漢晉宋屬丹陽郡隋屬江都郡唐武德三年置

茅州七年州廢屬蔣州九年屬潤州乾元元年屬昇州有茅
山一名句曲山形如句字之曲縣取名焉

次畿溧水縣本溧陽縣二漢晉宋屬丹陽郡隋改為溧水縣屬
蔣州唐武德三年屬揚州七年屬宣州乾元元年屬昇州伍
子胥自楚出奔未至吳而疾止中道乞食於溧陽即此

次畿溧陽縣唐武德三年析溧水縣置屬揚州九年屬宣州上
元元年屬昇州

望宣州春秋屬吳戰國屬越後屬楚秦屬鄣郡二漢屬丹陽郡
吳為重鎮晉徙丹陽於建鄴而以其地置宣城郡宋齊梁陳
因之梁兼置南豫州隋平陳郡廢改州為宣州大業初復置
宣城郡唐武德三年曰宣州天寶元年曰宣城郡吳升為寧
國軍節度 皇朝因之今縣六

望宣城縣本宛陵縣二漢為丹陽郡治晉置宣城郡宋齊梁陳

因之隋廢郡而改宛陵曰宣城置宣州唐因之亦吳懷安縣地屬丹陽郡晉屬宣城郡宋齊梁陳因之隋省入宣城有敬亭山

望南陵縣漢春穀縣地屬丹陽郡東漢晉因之孝武改為陽穀後省梁置南陵縣及南陵郡陳置北江州隋平陳州郡並廢屬宣城郡唐武德四年屬池州州廢來屬亦漢宣城縣地屬丹陽郡東漢省之晉復置屬宣城郡後省故城在今縣東緊涇縣二漢屬丹陽郡晉置宣城郡宋齊梁陳因之唐武德三年置南徐州尋更名猷州八年州廢來屬故安吳縣吳分宛陵置晉宋齊梁陳屬宣城郡隋省入涇唐武德三年復置八年又省亦陵陽縣地二漢晉屬丹陽郡成帝以皇后諱改為廣陽縣宋因之後省有陵陽山列仙傳云陵陽子明釣得白龍放之後三年龍迎子明上陵陽山仙去因以名縣

緊寧國縣吳分宛陵置晉宋齊梁陳皆屬宣城郡隋省入宣城

唐武德三年復置屬宣州六年又省天寶三載復置

緊旌德縣唐寶應二年析太平縣置屬宣州有棲真山

中太平縣唐天寶十一載析當塗涇縣置屬宣州大歷中省永泰中復置

上歙州春秋屬吳戰國屬越後屬楚秦屬鄣郡二漢屬丹陽郡吳孫權分置新都郡晉武帝改為新安郡宋齊因之後廢隋平陳置歙州大業初置新安郡唐武德四年復置歙州天寶元年曰新安郡 皇朝因之統縣六

望歙縣二漢屬丹陽郡吳孫權使賀齊平山越於是立始新都尉於歙之華鄉令齊守之遂置始新縣及新都郡晉太康元年改郡曰新安後郡廢而省始新入歙隋平陳廢歙開皇十一年復置屬歙州大業初屬新安郡唐為歙州治焉

望休寧縣孫權分歙置休陽縣晉武帝改為海寧屬新安郡宋
因之隋開皇十八年改為休寧大業初置新安郡唐屬歙州
望祈門縣本黟縣地唐代宗時歙州賊方清據此為壘永泰二
年平賊因其壘置祈門縣屬歙州有祈山閭門灘善覆舟
望婺源縣唐開元二十八年析休寧置屬歙州

望績溪縣唐永徽五年分歙置北野縣屬歙州後更名績溪
望黟縣二漢屬丹陽郡晉宋屬新安郡隋平陳縣廢開皇十一
年復置屬歙州唐因之有林歷山吳賀齊討山越賊保林歷
山四面險絕齊使以鐵杙琢山而升出其不意遂平賊

上江州古楊荆二州之境春秋戰國屬楚秦屬九江郡二漢屬
廬江豫章二郡晉惠帝置尋陽郡兼置江州初治豫章成帝咸
康六年移治尋陽中流襟帶常為重鎮宋齊梁陳因之隋平陳
郡廢大業初州廢置九江郡唐武德四年復置江州天寶元年

曰尋陽郡

皇朝因之今縣五

望德化縣本尋陽縣二漢屬廬江郡吳柴桑春郡晉復屬廬江
永興元年置尋陽郡咸康六年江州自豫章徙治尋陽縣本
在江北温嶠移置江南後省入柴桑柴桑縣二漢屬豫章郡
曹公攻劉備於夏口時孫權擁兵柴桑以觀成敗諸葛亮說
權與并力拒曹公故城在今縣南所謂楚城鎮是也宋齊梁
陳皆為尋陽郡及江州治焉隋平陳郡廢復改縣曰尋陽開
皇十八年改曰彭蠡大業初改曰湓城置九江郡唐復曰尋
陽置江州五代時改為德化禹貢九江在州西北始別於鄂
陵終會於江口有廬山柴桑山彭蠡湖

緊德安縣本歷陵縣地二漢屬豫章郡晉屬鄱陽郡後省五代
時置德安縣屬江州有禹貢敷淺原

中瑞昌縣五代時置屬江州有王喬山清虛玉華洞

中湖口縣五代時置屬江州晉盧循之敗悉力柵左里宋武帝
攻其柵循單舸走衆皆降即彭蠡湖口今縣是也

中彭澤縣禹貢彭蠡澤在西因以名縣二漢晉屬豫章郡宋省
之後復置梁置太康郡隋平陳郡縣並廢而置龍城縣屬江
州開皇十八年復改曰彭澤唐因之有馬當山

上池州春秋屬吳戰國屬越後屬楚秦屬鄣郡二漢屬丹陽郡
晉屬宣城郡宋齊梁陳隋因之唐武德四年析宣州置池州正
觀元年州廢永泰元年復置後曰池陽郡 皇朝因之今縣

六

望貴池縣本石城縣地二漢屬丹陽郡晉以後屬宣城郡隋平
陳縣廢開皇十九年置秋浦縣屬宣州唐分置池州五代時
改秋浦爲貴池有烏石山貴池

上青陽縣本臨城縣吳置晉屬宣城郡宋齊梁陳因之隋省入

南陵唐天寶元年析置青陽縣屬宣州後屬池州有九華山

上銅陵縣本南陵縣地唐析置義安縣又廢義安爲銅官五代

時置銅陵縣屬江寧府 皇朝開寶八年來屬有梅根山

利國山

上建德縣本至德縣唐至德二年析鄱陽秋浦置屬江州乾元
元年屬饒州永泰元年來屬五代時省後復置改爲建德有
石門山闌溪

上石埭縣唐永泰中析青陽秋浦置治古石埭城屬池州

中下東流縣五代時置屬江州 皇朝太平興國三年來屬

上饒州春秋屬楚後屬吳戰國屬越後復屬楚秦屬九江郡二
漢屬豫章郡吳孫權分置鄱陽郡晉宋齊梁陳因之梁兼置吳
州隋平陳郡廢改州爲饒州以其物產豐饒大業初復置鄱陽
郡唐武德四年曰饒州天寶元年曰鄱陽郡 皇朝因之今

縣六

望鄱陽縣本楚邑春秋吳伐楚取都是也秦時吳芮為番陽令甚得江湖間心號曰番君二漢屬豫章郡吳置鄱陽郡晉以後因之隋置饒州唐因之有鄱江故廣晉縣吳置曰廣昌即吳芮故城也晉太康元年更名為鄱陽郡治宋因之後省唐武德五年復置八年省入鄱陽

望餘干縣故越之西境所謂干越也二漢曰餘汗屬豫章郡晉宋齊梁陳隋屬鄱陽郡唐屬饒州有餘水北流入贛江

望浮梁縣本新平縣唐武德四年析鄱陽置屬饒州八年省開元四年復置新昌天寶元年更名浮梁有石藏山

望樂平縣本吳樂安縣晉宋屬鄱陽郡後省唐武德四年置樂平縣屬饒州九年省後復置

望德興縣五代析樂平置屬饒州有銀山

中安仁縣 皇朝開寶八年以餘干縣地置安仁場端拱元年升為縣

上信州春秋戰國皆屬越後屬楚秦屬九江會稽二郡二漢屬豫章會稽二郡晉宋及隋屬鄱陽東陽二郡唐乾元元年析饒州之弋陽衢州之常山玉山及建撫二州之地置信州後曰上饒郡 皇朝因之統縣六

望上饒縣吳置晉省之宋復置屬鄱陽郡後省唐武德四年復置七年省入弋陽乾元元年復置并置信州有上饒江

望玉山縣唐證聖二年析常山湏江弋陽置屬衢州乾元元年來屬有懷玉山

望弋陽縣吳置葛陽縣晉宋屬鄱陽郡隋開皇十二年改為弋陽屬饒州唐乾元元年來屬有弋溪寶豐鎮 皇朝開寶八年升為縣景祐二年省康定元年復置慶曆三年又省入

弋陽

望貴溪縣唐永泰元年析弋陽置屬信州有龍虎山貴溪
中鉉山縣五代時置 皇朝開寶八年以縣直隸京師後屬
信州有鉉山

中永豐縣唐乾元元年析上饒置屬信州元和七年省入為鎮
皇朝熙寧七年復升為縣有永豐山永豐溪

上太平州自唐以前地理與宣州同南唐置雄遠軍 皇朝

開寶八年改平南軍太平興國三年升為太平州今縣三

上當塗縣本漢丹陽縣地晉太康二年分置于湖縣成帝以淮
南當塗流民寓居于湖乃僑立當塗縣以治之分于湖為境
而於江南僑立淮南郡治于湖以當塗屬焉宋齊梁陳皆因
之隋平陳郡及于湖廢以當塗屬丹陽郡唐武德三年置南
豫州八年州廢屬宣州乾元元年屬昇州上元二年復屬宣

州南唐置雄遠軍 皇朝改為平南軍又改為太平州于

湖縣故城在今縣南丹陽鎮本丹陽縣二漢晉宋屬丹陽郡
後廢唐武德三年析江寧縣復置屬饒州九年州廢屬宣州
正觀元年省入當塗有牛渚山一名採石在縣北大江中晉
溫嶠回軍至牛渚磯聞鼓樂之音水深不可測乃燬犀角照
之見水族奇形異狀朱衣躍馬夜見夢嶠曰與君幽明道別
何得相照有丹陽湖慈湖

中蕪湖縣本吳鳩茲地左傳楚子重伐吳克鳩茲是也二漢晉

屬丹陽郡晉末僑立襄垣縣寄治無湖後屬淮南郡宋齊梁

陳因之隋平陳省襄垣入當塗五代時析當塗復置蕪湖縣

屬宣州 皇朝太平興國二年來屬有尺鑄山蕪湖

中繁昌縣晉之繁昌本屬襄城郡亂後於此僑立屬淮南郡而
分于湖為境宋齊梁陳因之隋平陳省繁昌入當塗五代時

析當塗復置屬宣州
隱靜山

皇朝太平興國二年來屬有靈山

同下州南康軍春秋戰國皆屬楚秦屬九江郡漢屬豫章郡東漢晉宋皆因之隋屬九江豫章二郡唐屬江洪二州 皇朝太平興國二年置南康軍今縣三

望星子縣本漢彭澤縣地屬豫章郡後為德化縣之星子鎮

皇朝太平興國三年置星子縣屬江州七年置南康軍有廬山彭蠡湖落星石昔有星墜水化為石縣鎮蓋因石為名吳越錢氏封為寶石山

望建昌縣本漢海昏縣地昌邑王賀廢遷於此屬豫章郡東漢

永元十六年置建昌縣晉宋齊梁陳隋因之而省海昏入焉

唐武德五年置南昌州八年州廢屬洪州 皇朝太平興

國七年來屬亦永脩縣地東漢中平中置晉宋齊梁陳皆屬

豫章郡隋省入建昌唐武德五年復置八年省亦新吳縣地東漢中平中置晉宋齊梁陳皆屬豫章郡隋省入建昌唐武德五年復置八年省永淳二年又置後省

上都昌縣本漢彭澤縣地唐武德五年置屬洪州八年廢屬江州 皇朝太平興國七年來屬有桑落山晉將劉毅為盧循所敗之地有釣磯山晉陶侃微時嘗登此垂釣

同下州廣德軍春秋屬吳戰國屬越後屬楚秦屬鄣郡二漢屬丹陽郡晉屬宣城郡宋齊因之梁置大梁郡又改為陳留郡隋平陳郡廢屬宣州唐因之南唐屬昇州 皇朝開寶八年屬

宣州太平興國四年置廣德軍今縣二

望廣德縣本漢丹陽郡地鴻嘉二年以為廣德國封中山靖王勝之後雲客是為夷王晉太康中置廣德縣及宋齊皆屬宣城郡梁分置石封縣并置大梁郡又改為陳留郡隋平陳郡

廢改石封為綏安縣屬宣州而省廣德入焉唐武德二載改
綏安為廣德南唐屬昇州 皇朝屬宣州後置廣德軍有
桐源山桐水左傳楚子西子期伐吳及桐汭即此
望建平縣本廣德縣之郎步鎮 皇朝端拱元年置建平縣
屬廣德軍有伍牙山伍貞伐楚還吳經此山因以為名

輿地廣記卷第二十四

輿地廣記卷第二十五

江南西路

都督洪州春秋戰國屬楚秦屬九江郡漢高帝改為淮南國分
置豫章郡東漢晉因之東晉置江州初治此後徙尋陽宋齊梁
陳皆為豫章郡隋平陳郡廢置洪州大業初州廢復置豫章郡
唐武德五年復曰洪州天寶元年曰豫章郡後升鎮南軍節度
皇朝因之今縣八

望南昌縣秦為九江郡南部漢高帝六年置豫章郡其城即灌
嬰所築東漢以後因之後改南昌曰豫章縣隋置洪州唐武
德五年析置南昌鍾陵縣以南昌置孫州八年州廢省南昌
鍾陵寶應元年避肅宗諱改豫章曰鍾陵正元中又改曰南
昌應劭漢官儀曰有豫章生於庭中故以名郡此木嘗中枯
晉永嘉中一旦更茂咸以為中興之祥其後元帝果興大業

於江南故郭璞南郊賦云弊樟擢秀於祖邑以司馬宣王之祖嘗為豫章太守故也有武陽水

望新建縣 皇朝太平興國六年析南昌縣置與南昌分治郭下有西山章水

望奉新縣本新吳縣漢中平中置晉以後屬豫章郡隋平陳省入建昌唐永淳二年復置屬洪州五代時改為奉新縣有華林山大雄山

望豐城縣吳分南昌縣地置富城縣晉太康元年改曰豐城屬豫章郡雷煥得龍淵太阿於此宋齊梁陳皆屬豫章郡隋平陳省之開皇十二年復置曰廣豐仁壽初改曰豐城屬洪州唐因之

望分寧縣本艾縣地左傳吳公子慶忌驟諫吳王弗聽出居于艾是也二漢屬豫章郡晉宋齊梁陳因之隋省入建昌唐正

元十五年析武寧置分寧縣屬洪州有旌陽山昔旌陽令許遜嘗遊此有脩水

緊武寧縣本西安縣地漢建安中孫權置晉太康元年改為豫寧屬豫章郡宋齊梁陳皆因之隋省入建昌唐長安四年復置武寧縣屬洪州景雲元年改曰豫寧寶應元年復曰武寧有幕阜山

中靖安縣五代時置有藥王山
進賢縣

上虔州春秋時百越之地戰國時吳起相楚悼王南平百越於是屬楚秦屬九江郡二漢屬豫章郡吳屬廬陵郡晉太康三年置南康郡宋為南康國齊梁陳復為南康郡隋平陳郡廢置虔州大業初州廢置南康郡唐武德五年曰虔州天寶元年曰南康郡後唐長興二年升為昭信軍節度 皇朝因之今縣十

望贛縣二漢屬豫章郡吳為廬陵南部都尉治晉置南康郡宋齊梁陳皆因之隋置虔州改贛縣為南康大業初復改為贛唐因之有贛水東源出雩都曰湖漢水西源出南野曰彭水二水皆北流合于贛縣摠為豫章水北流入大江後人因贛字以湖漢水為貢水彭水為章水而劉澄之遂以為章貢合流因以名縣蓋失之矣平固鎮本平固縣吳曰平陽晉太康元年更名屬南康郡宋因之後省為鎮

望虔化縣漢贛縣地吳置陽都縣晉太康元年改曰寧都後省焉宋復置大明五年以虔化屯別置虔化縣並屬南康郡後省虔化入寧都隋平陳改寧都曰虔化屬虔州唐因之上有梅嶺山漢時閩越反武帝令諸校屯豫章梅嶺待命閩越發兵入梅嶺殺漢校尉即此縣地有石鼓山

望興國縣本贛縣地

皇朝太平興國八年以險江鎮置興

國縣有覆笥山

望信豐縣本南康地唐永淳元年分置南安縣屬虔州天寶元年改為信豐

望雩都縣二漢屬豫章郡晉宋屬南康郡後省隋平陳復置屬虔州唐因之有金鷄山云時見金鷄出於石上有盤固山

望會昌縣本雩都縣地 皇朝太平興國八年以九州鎮置有君山

望瑞金縣本雩都縣地有金唐天祐元年置瑞金監後升為縣屬虔州有銅鉢山綿江

緊石城縣五代時置屬虔州

上安遠縣唐正元四年析雩都縣置屬虔州

中龍南縣本漢南野縣地五代時置屬虔州有聶都山山海經曰贛水出聶都山即此

上吉州春秋時百越之地戰國屬楚秦屬九江郡二漢屬豫章郡興平元年孫策分置廬陵郡吳寶鼎二年孫皓又置安城郡晉宋齊梁陳皆因之隋平陳二郡俱廢置吉州大業初復置廬陵郡唐武德五年曰吉州天寶元年曰廬陵郡 皇朝因之今縣八

望廬陵縣二漢屬豫章郡孫策改為石陽縣分置廬陵郡晉宋因之後復改石陽為廬陵縣隋置吉州唐因之有玉笥山望吉水縣本吉陽縣地吳置晉宋屬廬陵郡後省焉 皇朝太平興國九年置吉水縣有仁山吉水

望安福縣本漢安成縣屬長沙國東漢屬長沙郡吳屬安成郡晉改縣曰安復宋齊梁陳皆因之隋平陳郡廢改安復縣為安成十八年又曰安復屬吉州唐武德五年改縣曰安福置穎州七年廢來屬有廬水東至廬陵入贛江

望太和縣吳置西昌東昌二縣晉宋皆屬廬陵郡後西昌省東昌入焉改為太和縣屬吉州唐因之有贛石山遂興水望龍泉縣五代時置屬吉州有石舍山

望永新縣吳置屬安成郡晉宋因之後省唐武德五年復置屬南平州八年州廢省入太和顯慶二年復置來屬有永新山勝業水

望永豐縣本吉水縣地 皇朝至和元年以報恩鎮置永豐縣有雲蓋山報恩江

望萬安縣本龍泉縣地 皇朝熙寧四年以萬安鎮置有龍頭山雲洲

上袁州春秋為百越之地戰國屬楚秦屬九江郡二漢屬豫章郡吳屬安城郡晉宋齊梁陳因之隋平陳郡廢置袁州大業初州廢置宜春郡唐武德四年曰袁州天寶元年曰宜春郡

皇朝因之今縣四

望宜春縣二漢屬豫章郡吳屬安城郡晉孝武改為宜陽宋以後因之隋復改為宜春屬宜春郡唐因之有仰山袁江有宜春泉醞酒入貢

望分宜縣本宜春縣地

皇朝雍熙元年置有鍾山郡國志

云晉永嘉元年因水有大鍾從山上墜水中驗其銘是秦時樂器故以名山有昌山

望萍鄉縣吳置屬安城郡晉以後因之隋屬宜春郡唐因之有羅霄山揚岐水

緊方歲縣本陽樂縣地吳黃武中置晉太康元年改為康樂屬豫章郡宋因之謝靈運襲封康樂公即此後省焉唐武德五年復置陽樂縣屬靖州八年州廢省入高安五代時以其地置方歲縣屬洪州後屬筠州 皇朝開寶八年來屬有康

樂故城有謝山康樂水

上撫州春秋時百越之地戰國屬楚秦屬九江郡二漢屬豫章郡吳太平二年分置臨川郡晉以後因之隋平陳郡廢置撫州大業初州廢置臨川郡唐武德五年曰撫州天寶元年曰臨川郡 皇朝因之今縣四

望臨川縣本南昌縣地東漢永元八年置臨汝縣屬豫章郡吳孫亮分置臨川郡晉以後因之隋置撫州改臨汝縣為臨川唐因之有義峯山本曰銅山唐天寶中改名有臨川水

望崇仁縣本吳置巴仁縣屬廬陵郡置新建縣屬臨川郡晉宋因之梁改巴仁為巴山及置巴山郡隋平陳郡縣俱廢置崇仁縣屬撫州唐因之有崇仁山寶唐水

望宜黃縣唐武德五年析崇仁置屬撫州八年省 皇朝開寶八年以宜黃場復置有宜黃水

望金谿縣本臨川縣地

皇朝開寶五年以金谿場置有靈

秀山金谿水
上筠州自唐以前地理與洪州同南唐李景置筠州

皇朝

因之今縣三

望高安縣本建城縣二漢屬豫章郡晉以後因之縣出然石石
色黃白而踈理以水灌之則熟著鼎其上足以熟物元康中
雷煥入洛賫石以示張華華曰此謂然石於是始識其名隋
屬洪州唐武德五年改建城曰高安置靖州七年改為米州
又改為筠州八年州廢屬洪州南唐復置筠州有飛山鍾口
江

望上高縣五代時置屬洪州南唐來屬有八疊山斜口水

望新昌縣

皇朝太平興國三年以高安監步鎮置有黃蘗

山

同下州興國軍自五代以前地理與鄂州同

皇朝太平興

國二年置興國軍今縣三

望永興縣本鄂縣地二漢屬江夏郡吳孫權改鄂為武昌而別
置陽新縣屬武昌郡晉以後因之江左又析置永興縣隋平
陳改陽新曰富川開元十一年省永興入焉十八年改富川
縣曰永興屬鄂州唐因之

皇朝置興國軍有闔閭山吳

王闔閭與楚相持屯此

緊大冶縣

皇朝乾德五年以大冶場置屬鄂州太平興國

二年來屬有磁湖

中通山縣五代時置屬鄂州

皇朝太平興國二年來屬有

翠屏山本名石城唐天寶中改名

同下州南安軍自五代以前地理與虔州同

皇朝淳化元

年置今縣三

中大庾縣唐神龍元年析南康縣置屬虔州 皇朝置南安軍有大庾嶺五嶺之最東者亦曰東嶠有橫浦關漢討南越楊僕為樓舡將軍出豫章下橫浦是也有涼熱水水經注云連溪出南康縣涼熱山即此水也

望南康縣本漢南野縣地吳分置南安縣晉太康元年改曰南康屬南康郡宋因之改曰贛縣隋大業初復曰南康屬南康郡唐屬河州 皇朝淳化元年來屬南野鎮本南野縣二漢屬豫章郡晉屬廬陵郡宋屬南康郡後省為鎮有君山章水

上上猶縣五代時置屬虔州 皇朝淳化元年來屬有猶水

同下州臨江軍自五代以前地理與筠袁吉三州同 皇朝

淳化三年置今縣三

望清口縣五代時置屬洪州南唐屬筠州 皇朝置臨江軍

望新淦縣二漢屬豫章郡晉宋因之隋屬廬陵郡唐屬吉州

皇朝淳化三年來屬有玉筍山淦水

望新喻縣吳分宜春置晉宋屬安成郡隋屬宜春郡唐屬袁州

皇朝淳化三年來屬本曰新渝唐天寶後相承作喻有渝水

同下州建昌軍自唐以前地理與撫州同南唐析置建武軍

皇朝太平興國四年改名今縣二

望南城縣二漢屬豫章郡晉以後屬臨川郡隋唐屬撫州南唐置軍有麻姑山

望南豐縣吳置屬臨川郡晉宋因之後省唐景雲二年析南城

置屬撫州 皇朝淳化二年來屬有軍山

輿地廣記卷第二十五

輿地廣記卷第二十六

荆湖南路

上潭州古三苗國之地春秋戰國屬楚秦置長沙郡漢為國東漢復為郡晉屬長沙及衡陽郡永嘉元年兼置湘州宋齊梁陳因之隋平陳郡廢置潭州以昭潭為名大業初州廢置長沙郡唐武德四年曰潭州天寶元年曰長沙郡升為武安軍節度皇朝因之今縣十一

望長沙縣故青陽地秦始皇二十六年荆王獻青陽以西是也漢為臨湘縣高帝五年以封吳芮為長沙王都此其城即芮所築東漢及晉為郡宋為國齊梁陳為郡隋為潭州唐因之唐末馬氏父子竊據其地後為南唐所取有嶽麓山昭山山下有旋泉深不可測人以為昭潭無底有湘水瀉水有賈誼宅井仍存



望衡山縣本湘南縣地吳析置衡陽縣及置衡陽郡晉惠帝改縣曰衡山宋齊梁陳因之隋平陳郡廢屬潭州唐神龍三年屬衡州 皇朝淳化四年來屬禹貢衡山在西南有三峯曰祝融紫蓋石廩韓愈詩紫蓋連延接天柱石廩騰擲堆祝融有湘水

望安化縣本益陽縣地

皇朝熙寧六年置有浮青山資水

緊醴陵縣本漢臨湘縣地高后封長沙相越為醴陵侯即此東漢置醴陵縣屬長沙郡建安八年縣有大山常鳴如牛响聲積數年後豫章賊攻沒縣亭晉宋皆屬長沙郡後省唐武德四年復置屬潭州有王喬山醴泉

上攸縣漢屬長沙國東漢晉宋屬長沙郡後改為攸水隋平陳省入湘潭縣後復置唐武德四年置南雲州正觀元年州廢屬衡州五代時來屬有雲陽山攸水

中湘鄉縣本湘南縣之湘鄉東漢置縣屬零陵郡晉宋屬衡陽郡後省唐武德四年析衡山置屬潭州有漣水歷石魚山下石色黑而理若雲母開發一重輒有魚形長數寸鱗鱗首尾若刻畫燒之作魚膏腥

中湘潭縣本湘南縣地禹貢衡山在東南湘中記曰衡山有五牒禹案其文以治水遙望衡山如陣雲沁湘千里九向九背迺不復見漢屬長沙國東漢屬長沙郡晉宋屬衡陽郡後省而置湘潭縣隋屬衡州唐元和後來屬有湘水涓湖

中益陽縣漢屬長沙國東漢晉宋齊梁陳屬長沙郡隋唐屬潭州有浮丘山益水水經注以益水為資水之殊目縣南十里有平崗岡有井數百淺者四五尺深者不測俗云昔有金人以杖撞地輒便成井

中瀏陽縣本漢臨湘地吳置瀏陽縣屬長沙郡晉宋因之後省

唐景龍二年析長沙復置屬潭州有瀏水

中湘陰縣本羅縣地宋元徽二年分置湘陰縣屬湘東郡齊因之梁置羅州及岳陽郡陳廢州隋平陳郡廢省湘陰入岳陽縣置玉州尋改岳陽為湘陰縣開皇十一年州廢屬岳州唐因之皇朝淳化四年來屬故羅縣屬長沙郡二漢晉宋齊之西楚文王徙羅子居此秦為羅縣屬長沙郡二漢晉宋齊因之梁陳屬岳陽郡隋平陳屬岳州唐武德八年省入湘陰故城在今縣東北有湘山湘水汨水出艾縣栢山西逕羅縣北又西逕吳昌縣北東漢置曰漢昌吳更名隋省入羅又西逕玉笥山又西為屈潭楚屈原被讒放逐懷沙自沉於此又逕汨羅戍南又西入于湘春秋所謂羅汭也有黃陵水上承大湖西流入湘逕二妃廟南世謂之黃陵廟秦始皇遊至湘山逢大風問博士曰湘君何神博士對曰堯女舜妻而葬此

始皇大怒使刑徒三千人伐湖山木赭其山焉

中寧鄉縣吳新陽縣地晉太康元年改為新康屬衡陽郡宋以後因之隋平陳省入益陽縣唐武德四年復置七年又省

皇朝太平興國二年析長沙置有大瀉山青陽山瀉水

上衡州春秋戰國屬楚秦屬長沙郡二漢屬長沙桂陽二郡吳置湘東衡陽二郡晉宋齊梁陳皆因之隋平陳省二郡置衡陽大業初州廢置衡山郡唐武德四年曰衡州天寶元年曰衡陽郡皇朝因之今縣五

望衡陽縣本鄴縣地漢屬長沙國東漢屬長沙郡吳置湘東郡及臨丞縣東南去鄴縣十五里晉因之太元二十年省鄴入焉宋齊梁陳因之隋平陳置衡州改臨丞為衡陽縣唐因之亦漢鍾武縣地屬零陵郡東漢改為重安晉宋以後屬衡陽郡隋省入衡陽縣後復置唐武德七年又省入有岫嶺山即

南岳之別名有湘水沘水有合江亭韓愈詩江亭枕湘江沘水會其左有酃湖周回三里取水為酒極醇美晉武帝平吳始薦酃酒於太廟

中茶陵縣漢屬長沙國東漢屬長沙郡晉屬湘東郡宋齊梁陳因之隋省入湘潭縣唐武德四年析攸縣復置屬南雲州正觀元年又省聖厯元年復置來屬有雲陽山茶水漢地理志茶陵有泥水西入湘水經謂之沫水即今茶水是也茶弋奢反

中耒陽縣二漢屬桂陽郡晉宋以後因之隋平陳改曰沅陰屬衡州唐武德四年復曰耒陽有侯曇山沅水出郴縣西北過沅陽又北至衡陽入湘

中下常寧縣吳分沅陽置新寧縣晉屬湘東郡宋齊梁陳皆因之隋屬衡州唐天寶元年改曰常寧有逍遙山湘水宜水

下安仁縣 皇朝乾德三年以安仁場置後析衡陽衡山二縣地入焉

中道州春秋戰國屬楚秦屬長沙郡漢分屬零陵郡東漢晉因之穆帝分置營陽郡宋齊因之梁改為永陽郡隋平陳郡廢屬永州大業初州廢屬零陵郡唐武德四年平蕭銑置營州五年改為南營州正觀八年改為道州天寶元年曰江華郡皇朝因之今縣四

緊營道縣本漢營浦縣屬零陵郡晉置營陽郡宋齊因之而析置營陽縣為郡治梁改郡縣皆曰永陽隋開皇中郡廢省營浦入永陽屬永州唐武德四年置營州改永陽為營道縣正觀八年改營州為道州天寶元年改營道為弘道縣皇朝建隆三年復曰營道有營道山營水出冷道縣西流逕九疑山下又西逕營道又屈而東北逕營浦又北流注于湘

亦虞時鼻國之地有象祠唐元和中刺史薛伯高毀之柳宗元作斥鼻亭神記

緊永明縣本漢營浦縣地唐既徙置營道於永陽乃徙置永陽於此屬道州正觀八年省天授二年復置天寶元年更名皇朝熙寧五年省為鎮入營道元祐二年復置

緊江華縣漢馮乘縣地屬蒼梧郡唐武德四年析置江華縣屬道州正觀十七年屬永州上元二年復來屬文明元年改曰雲漢神龍元年復故有吳望山沱水

緊寧遠縣漢冷道營道二縣地並屬零陵郡東漢及晉皆因之東晉屬營陽郡宋齊因之梁陳屬永陽郡隋省冷道入營道而徙營道於冷道廢城屬永州唐武德四年徙置營道於永陽縣乃於此地置唐興縣屬營州正觀八年屬道州長壽二年改曰武盛神龍元年復曰唐興天寶元年改曰延唐朱梁

改曰延昌後唐復故晉天福初曰延喜 皇朝乾德三年

改為寧遠有九疑山虞舜所葬其山九谿相似故名有冷水出此山北流逕冷道西南又北流入都溪水故大庾縣本漢冷道之舂陵鄉長沙定王封其子置是為舂陵節侯後省吳復置屬零陵郡東晉屬營陽郡宋齊因之梁陳屬永陽郡隋平陳省入營道唐大庾二年析延唐縣置於舂陵故城北十五里名曰大庾屬道州 皇朝乾德三年省入寧遠有舂溪水即所謂都溪也西北流入于營水

中永州春秋戰國屬楚秦屬長沙郡漢元鼎六年置零陵郡東漢吳晉宋齊梁陳因之隋開皇初郡廢置永州大業初州廢復置零陵郡唐武德四年平蕭銑置永州天寶元年曰零陵郡皇朝因之今縣三

望零陵縣本漢泉陵縣屬零陵郡東漢為郡治晉宋齊梁陳因

之隋置永州改泉陵為零陵縣唐因之泉陵故城在今縣北二里亦晉應陽縣地惠帝分觀陽置屬零陵郡宋齊梁陳因之隋省入零陵縣應水東南流入湘有臯墟象之所封也有萬石山瀟湘水縣有香茅自古貢之禹貢荊州菁茅也

中祁陽縣吳分泉陵置屬零陵郡晉宋齊梁陳因之隋省入零陵縣唐武德四年復置屬永州亦吳永昌縣地晉宋齊梁陳屬零陵郡隋省入零陵縣後分入祁陽有石鷲山石色紺而狀似鷲或大或小若母子及雷風相薄則群飛頡頏有湘水

中東安縣

皇朝雍熙元年以零陵縣之東安場置

中郴州春秋戰國屬楚秦屬長沙郡項羽尊楚懷王為義帝都郴漢高帝二年置桂陽郡東漢晉宋齊梁陳因之隋開皇中平陳郡廢置郴州大業初州廢復置桂陽郡唐武德四年平蕭銑置郴州天寶元年曰桂陽郡 皇朝因之今縣四

緊郴縣義帝所都項羽使英布害之縣南有義帝冢漢屬桂陽郡東漢以後因之隋置郴州唐因之有靈壽山古所謂萬歲山也有石室室有鍾乳上悉生靈壽木下有千秋溪又有淥水出縣東侯公山西北流而南屈注于耒謂之程鄉溪昔置酒官醞於山下名曰程酒獻同酃酒焉

中桂陽縣漢郴縣地東晉分置汝城縣屬桂陽郡宋齊梁因之陳改為盧陽縣及置盧陽郡隋平陳郡廢以縣屬郴州唐天寶元年改為義昌後唐改曰郴義 皇朝太平興國元年

改為桂陽有耒山耒水所出西北流逕汝城縣北又西北逕晉寧縣北又北過郴縣西又北過便縣西又西北過耒陽縣東又北過酃縣東又西北至臨烝而右注湘水

中宜章縣隋大業末蕭銑析郴置義章縣屬郴州唐因之皇朝太平興國元年改曰宜章亦二漢臨武縣地屬桂陽郡

晉宋齊梁陳因之隋唐屬郴州後廢有武溪南入樂昌有嵐嶺

中永興縣漢便縣屬桂陽郡東漢吳晉因之宋省焉唐開元十三年置安陵縣屬郴州天寶元年改為高亭 皇朝熙寧六年改為永興有高亭山安陵山

中邵州春秋戰國屬楚秦屬長沙郡二漢屬長沙零陵二郡吳寶鼎元年分置邵陵郡晉宋齊梁陳因之隋平陳郡廢屬湘州唐武德四年平蕭銑置南梁州正觀十年改為邵州天寶元年曰邵陽郡 皇朝因之今縣三

望邵陽縣漢曰昭陵屬長沙郡吳置邵陵郡晉改縣曰邵陵宋因之後省入邵陽郡陽本昭陽東漢置屬零陵郡晉武帝改焉屬邵陵郡宋因之後併邵陵入而以邵陽為郡治隋郡廢屬湘州唐武德四年復置邵陵縣七年省入邵陽後置邵州

又吳置高平縣屬邵陵郡晉宋因之後省入邵陽有文斤水邵陵水

望新化縣 皇朝收復梅山以其地置新化縣屬邵州有長龍山瀆水

下蔣竹縣 皇朝元豐四年以洞溪徽州置蔣竹縣屬邵州有九龍山蔣竹水

下全州自後唐以前地理與永州同石晉天福三年楚王馬希範奏置全州 皇朝因之今縣二

望清湘縣漢零陵洮陽二縣地並屬零陵郡東漢晉宋齊梁陳皆因之隋省而置湘源縣屬永州唐因之後改為湘川楚又改為清湘而置全州有湘山宜湘水漢洮陽故城在今縣西北零陵故城在南

中灌陽縣漢零陵縣地吳分置觀陽屬零陵郡晉宋齊梁陳皆

因之隋省入湘源縣大業末蕭銑復置屬永州唐武德七年
省上元二年復置石晉時來屬有灌水

同下州武國軍自五代以前地理與邵州同 皇朝因之

中武岡縣二漢都梁縣地屬零陵郡晉武帝分置武岡縣屬邵
陵郡宋因之後省入都梁縣隋又省都梁入邵陽縣後復置
曰武攸唐武德四年改為武岡屬南梁州後屬邵州

皇朝置武岡軍縣左右二岡對峙重岨齊秀間可二里舊傳
東漢伐五溪蠻蠻保此崗故曰武岡亦二漢夫夷縣地屬零
陵郡吳屬邵陵郡晉宋齊梁陳皆因之隋省入邵陽唐分屬
武岡故城在縣東北晉武帝置建興縣屬邵陽郡晉宋因之
後省焉唐武德四年復置七年省入武岡有唐糾山瀆水所
出

同下州桂陽監自五代以前地理與郴州同後置桂陽監

皇朝因之今縣二

上平陽縣按舊唐史志云晉分郴置平陽縣陳廢蕭銑復置唐
武德七年省八年復置屬郴州然晉宋二志皆無此縣五代
時廢焉 皇朝天禧元年復置桂陽監治此有大湊山靈
星江

中藍山縣本二漢南平縣屬桂陽郡晉宋因之後省唐咸亨二
年復置屬郴州天寶元年改為藍山 皇朝景德元年來
屬有藍山

輿地廣記卷第二十七

荆湖北路上

次府江陵府春秋已來為楚都秦昭襄王二十九年置南郡漢高帝元年改為臨江郡五年復故景帝二年為臨江國中二年復故東漢晉宋齊梁陳因之梁元帝都焉為西魏所滅以封後梁為蕃國隋開皇七年併後梁置江陵摠管府二十年改為荊州大業初復置南郡唐武德四年平蕭銑置荊州天寶元年曰江陵郡後升荆南節度上元元年置南都及江陵府尋罷都五代為南平王高氏所據 皇朝復之今縣八

次赤江陵縣故楚郢都之地戰國時秦使白起拔郢分郢置江陵縣及置南郡而楚徙都陳項羽封楚柱國共敖為臨江王漢得之以為郡景帝復封子榮為臨江王國除復為南郡東漢省郢入江陵建安中劉備有之後入於吳晉 州治此

東晉爲重鎮宋齊因之梁元帝以爲都西魏使于謹平江陵以封後梁蕭詧隋置荊州大業末爲蕭銑所據唐置江陵郡江陵府縣北十里有紀南城楚文王自丹陽徙此後遷於郢平王時子囊城之故城在縣東南有渚宮今郡城晉桓溫所築有龍山漢江

次畿公安縣本二漢孱陵縣地建安中左將軍劉備爲荊州牧自襄陽來鎮油口使築而居之時號左公因名其地曰公安晉杜預平江南置江安縣屬南平郡宋爲郡治後改爲公安陳置荊州隋屬江陵摠管府唐因之孱陵鎮故孱陵縣二漢屬武陵郡晉宋齊梁陳屬南平郡隋省入公安有謝山油水

次畿潛江縣漢江陵縣地

皇朝乾德三年置有漢江

次畿監利縣本漢華容縣地吳置監利縣尋省晉太康四年復置屬南郡宋孝建元年屬巴陵郡隋屬沔陽郡唐屬復州朱

梁開平三年來屬有五花山

次畿松滋縣本漢高城縣地屬南郡東漢省而漢松滋縣屬廬江郡晉屬安豐郡晉以松滋流民避亂至此乃僞置縣以治之屬南郡宋屬南河東郡齊梁陳皆因之隋開皇中郡廢屬荊州唐因之縣西有上明廢城東晉荊州刺史桓冲以符秦疆盛自襄陽退屯於此其城即冲所築

次畿枝江縣故羅國楚自宜城西山徙之於此後又徙之湘陰二漢爲枝江縣屬南郡晉宋齊梁陳因之隋屬荊州唐屬江陵府上元元年省入長寧縣大厯六年復置省長寧入焉皇朝熙寧六年省入松滋縣後復置縣西有津鄉春秋巴人伐楚楚子禦之大敗於津鄉此其地也

次畿石首縣本二漢華容縣屬南郡晉宋因之後省唐武德四年置石首縣屬荊州以石首山爲名

次畿建寧縣 皇朝乾德三年置熙寧六年省入石首元祐元年復置

緊鄂州春秋以來屬楚秦屬南郡漢屬江夏郡東漢因之吳分置武昌郡晉宋屬江夏武昌二郡兼置郢州齊因之梁分置北新州及上雋郡隋平陳三郡俱廢改置鄂州大業初復置江夏郡唐武德四年平蕭銑復為鄂州天寶元年復為江夏郡後升武昌軍節度 皇朝因之今縣七

緊江夏縣本二漢沙羨縣地屬江夏郡建安中荊州牧劉表使黃祖守沙羨為孫權所破吳省之晉太康元年復置後屬武昌郡東晉僑置汝南郡此為汝南縣隋平陳置鄂州改縣曰江夏唐因之按水經夏水本江之別出自江陵縣東南流又東過華容縣南又東至雲杜縣入沔謂之賭口冬竭而夏流故曰夏水自賭口下沔水通兼夏口而南至魯山下會于江

在今縣西故得江夏之名春秋時謂之夏汭後世謂之夏口亦謂之魯口歷代常為重鎮梁武帝自襄陽起兵進逼郢城有數百毛人踰堞且泣因投黃鵠磯蓋城之精也明旦城降有黃鸛山鸚鵡洲

望崇陽縣唐天寶二年開山洞置唐年縣屬鄂州朱梁改為臨江夏後唐復故名石晉天福初改為臨江 皇朝開寶八年改為崇陽

上武昌縣故楚之東鄂也楚子熊渠封中子紅為鄂王二漢鄂縣屬江夏郡吳孫權都之黃初三年改為武昌縣及置江夏郡黃龍元年遷都建業以陸遜輔太子鎮武昌孫皓亦嘗都此及東還使滕牧守之晉太康元年改江夏郡曰武昌郡永平中始置江州傅綜為刺史治此東晉時庾亮謝尚亦鎮焉宋齊梁陳皆為武昌郡隋屬鄂州唐因之故西陵縣二漢屬

江夏郡魏屬弋陽郡晉惠帝分屬西陽國宋因之陳省入武昌有樊山岢嶸洲晉劉毅破桓玄於此

中蒲圻縣晉太康元年置屬長沙郡宋元嘉十六年屬巴陵郡孝建元年屬江夏郡梁置上雋郡隋平陳郡廢屬鄂州唐因之有赤壁山漢末孫權遣周瑜與劉備併力敗曹公于此有

蒲圻湖

中咸寧縣五代時置永安縣屬鄂州

皇朝景德四年改今

名有鍾臺山牛臯潭

中通城縣本崇陽縣地

皇朝熙寧五年升通城鎮為縣有

九嶺山鷄鳴山太平港

下嘉魚縣晉沙陽縣地屬武昌郡宋元嘉十六年屬巴陽郡孝建元年屬江夏郡梁置沙州尋廢隋省沙陽入蒲圻五代時置嘉魚縣屬鄂州有魚嶽山在大江中

中安州春秋戰國屬楚秦屬南郡漢高帝置江夏郡東漢晉因之宋孝建元年分置安陸郡齊因之梁置南司州尋罷西魏置安州摠管府隋開皇初郡廢十四年府廢大業初復置安陸郡唐武德四年平王世充改為安州天寶元年復曰安陸郡後唐升安遠軍節度 皇朝因之今縣五

中安陸縣漢屬江夏郡晉為郡治宋置安陸郡梁置南司州西魏置安州隋唐因之漢江夏郡故城在東南有禹貢陪尾山石巖山晉張昌作亂山下鎮南將軍劉弘擊斬之有瀕水東南入沔有雲夢澤然楚之雲夢跨江南北非止此而已

中雲夢縣西魏置隋屬安州唐因之

皇朝熙寧二年省入

安陸元祐元年復置按漢地理志西陵縣為江夏郡治而有雲夢官疑此地是也

中應城縣漢雲杜縣地西魏置隋大業初改曰應陽屬安陸郡

唐武德四年復曰應城屬安州元和三年省入雲夢大和二年復置天祐二年改曰應陽後唐復故有決河水出大洪山東流入于瀆有溫泉水出京山東澤中淵靜如鑑聞人聲則湯湯奮發其熱可以燂鷄東南流注于瀆有蒲騷城左傳鄭人軍於蒲騷是也

中孝感縣本孝昌縣宋孝武帝置屬江夏郡西魏置岳州及岳山郡後周並廢又有潞岳郡隋開皇初廢以縣屬安州唐武德四年置潞州及潞陽縣八年州廢省潞陽入孝昌來屬元和三年省入雲夢咸通中復置後唐改爲孝感有潞河鎮九

宗山

中下應山縣本東漢平春縣地屬江夏郡晉因之宋屬義陽郡後省梁置永陽縣及應州隋大業初州廢改永陽爲應山屬安陸郡唐屬安州有大龜山石龍山潒水按水經潒水出江

夏平春縣西南過安陸入于瀆

上復州春秋戰國屬楚秦屬南郡二漢屬南江夏二郡晉元康元年分置竟陵郡宋齊因之梁又置沔陽郡後周置復州隋因之而郡廢大業初州廢復置沔陽郡唐武德五年改爲復州天寶元年又曰竟陵郡石晉天福初改曰景陵郡 皇朝因之 熙寧六年州廢後復置今縣三

緊景陵縣楚封大夫鬬辛於此是爲郟公戰國秦使白起攻楚拔郢東至竟陵二漢屬江夏郡晉置竟陵郡後省入霄城後周復改霄城爲竟陵隋開皇初州自建興移治此仁壽三年州仍治建興正觀七年徙治沔陽五代時又徙治此

皇朝熙寧六年州廢屬安州後復置來屬有巾水戍山晉元熙三年竟陵郡言巾水戍山得古銅鍾七枚藏於相府有漢水夏水

下沔陽縣春秋鄭子之國漢雲杜縣地屬江夏郡東漢晉因之
宋屬竟陵郡後省梁置沔陽郡西魏省州陵惠懷二縣置縣
曰建興後周置復州隋開皇初州移治竟陵仁壽三年州仍
治建興大業初改建興曰沔陽州廢仍置沔陽郡唐武德中
屬復州正觀七年州徙治此五代時又徙治景陵 皇朝熙
寧七年省入監利後復置來屬雲杜城在縣西北又有石城
在西南西臨沔水因山為固晉杜預為荊州刺史開陽口達
巴陵徑千餘里內避長江之險通零桂之漕即此惠帝始置
竟陵郡治此

下玉沙縣

皇朝乾德三年以白沙院置屬江陵府至道三

年來屬熙寧六年省入監利元祐元年復置按唐地理志郢
州富水有白沙山白沙水所出而水經言江水過下隲東得
白沙口謂白沙水入江處也然則白沙院之取名蓋以水所

經矣

上鼎州春秋戰國皆屬楚秦屬黔中郡漢屬武陵郡東漢晉末
齊皆因之梁置武州後改曰沅州隋平陳郡廢改州曰朗州大
業初州廢復置武陵郡唐武德四年平蕭銑置朗州天寶元年
復曰武陵郡 皇朝因之大中祥符五年改曰鼎州今縣三
望武陵縣本漢臨沅縣屬武陵郡東漢為郡治晉宋齊梁陳皆
因之晉趙欽問潘京曰貴郡何以名武陵京云鄙郡本名義
陵郡在辰陽縣界與夷相接數為所敗光武移東出共議易
号傳曰止戈為武詩稱高平曰陵隋廢郡置朗州改臨沅為
武陵縣唐因之 皇朝改曰鼎州故漢壽縣本名索漢為
武陵郡治東漢陽嘉三年更名為荊州刺史治而郡徙治臨
沅至魏州徙治江陵吳改漢壽為吳壽晉復故宋齊梁陳皆
因之隋省入武陵有武陵山桂山上有善卷壇有沅水鼎水

枉渚

望桃源縣東漢沅南縣地建武二十六年置屬武陵郡晉宋齊梁陳皆因之隋省入武陵 皇朝乾隆元年析武陵置桃源縣有桃源山晉陶潛桃源記云太元末有漁人深入武陵溪見桃花夾岸居人衣服皆秦製自言避秦隱居數世矣不知市朝之變漁人既出後再尋之路迷終不能至有沅水中龍陽縣吳置晉宋齊梁陳皆屬武陵郡隋唐屬朗州有龍陽山零水有龍陽洲吳李衡植柑於其上臨死謂其子曰吾洲有木奴千頭不責衣食歲絹千疋後柑成果如其言

上澧州春秋戰國皆屬楚秦屬黔中郡二漢屬武陵郡吳孫休永安六年分置天門郡晉宋以後因之隋平陳郡廢置松州尋改爲澧州大業初置澧陽郡唐武德四年平蕭銑置澧州天寶元年曰澧陽郡 皇朝因之今縣四

望澧陽縣晉太康四年置屬天門郡宋因之後省焉隋復置及置澧州大業初置澧陽郡唐爲澧州有大浮山崇山昔舜放驩兜於此有澧水涔水涔東南流入澧

中下安鄉縣東漢作唐縣地後置安鄉縣隋屬澧州唐因之作唐縣東漢分孱陵置屬武陵郡晉置南平郡宋齊梁陳皆因之隋開皇中郡廢改作唐爲孱陵屬澧州唐正觀元年省入安鄉亦漢壽縣地有澧水澹水按水經注澧水東逕安南縣南澹水注之水上承澧水於作唐東逕其縣北又東注于澧謂之澹口龍王仲宣詩所謂悠悠澹澧是也

中下石門縣漢零陽縣地吳時武陵充縣松梁山有石洞開廣數十丈其高似弩仰射不至名曰天門孫休以爲佳祥置天門郡於此晉宋齊梁陳皆因之隋開皇中郡廢置石門縣屬澧州唐因之有層山水經注所謂澧水東歷層步山是也有

淩水漆水水東注澧水謂之漆口

下慈利縣二漢零陵縣屬武陵郡晉宋屬天門郡後省隋開皇中復置屬澧州十八年改曰慈利唐因之亦淩中縣地吳置晉宋屬天門郡後省亦崇義縣地後周置衡州隋開皇中置縣十八年改州曰崇州大業初州廢屬澧陽郡唐屬澧州麟德元年省入慈利有九度山澧水

中峽州春秋戰國屬楚秦二漢屬南郡魏武平荊州分置臨江郡劉備改爲宜都郡吳晉宋齊梁皆因之兼置宜州西魏改曰拓州後周改曰硤州隋開皇七年郡廢大業初州廢置夷陵郡唐武德二年復爲硤州天寶元年曰夷陵郡 皇朝因之今縣四

中夷陵縣夷山在西北縣以爲名秦令白起伐楚三戰而燒夷陵即此二漢屬南郡建安十五年劉備以屬宜都郡吳黃武

元年改曰西陵以爲重鎮郡城陸抗所築也晉太康元年復故名宋齊梁陳皆因之隋置夷陵郡唐置硤州巴山寨本巴山縣隋分長陽置屬清江郡後省唐武德四年復置屬睦州八年屬東松州正觀元年屬硤州天寶八載省入長陽五代時復置 皇朝開寶八年省入夷陵有西陵山虎牙山石壁色紅間有白文類牙形焉有黃牛硤南岸高崖間有色如人牽牛狀人黑牛黃此巖旣高加以江湍紆迴行者謠曰朝發黃牛暮宿黃牛三朝三暮黃牛如故

中宜都縣二漢夷道縣地屬南郡劉備置宜都郡晉宋齊梁皆因之又析夷道置宜昌縣隋開皇七年郡廢宜昌屬江陵府大業初夷道屬夷陵郡唐武德二年改宜昌爲宜都以宜都及夷道置江州六年曰東松州正觀元年州廢省夷道入宜都來屬有荆門山上合下開通徹山南有門象焉大江東歷

荆門虎牙二山之間荆門在南虎牙在北為楚之西塞故郭璞江賦曰虎牙築起以屹萃荆門闢竦而盤薄圓淵九回以高騰溢流雷响而電激也東漢建武中岑彭擊荆門破公孫述將任滿田戎於此有勾將山夷水自施州東北流至縣北注大江即清江水也

中下長陽縣本佷山漢屬武陵郡東漢屬南郡晉屬宜都郡太康元年改為興山後復故宋因之後改為長陽隋屬江陵府唐武德四年置睦州八年州廢屬東松州正觀元年州廢來屬故鹽水縣後周置及立亭州資曰郡隋開皇初郡廢大業初改州為庸州又廢為清江郡後郡徙而縣省唐武德四年復置屬睦州八年省入長陽昔巴蠻廩君乘土舡從夷水下至鹽陽射殺神女又下及夷城而居之蓋此地也有佷山出藥草恒山世以銀為音有長陽溪出射堂村東六七里谷中

有石穴清泉瀆流三十許步復入穴其水重源顯發北流注于夷水

中下遠安縣本東晉沮陽縣地義熙初分置高安縣及汶陽郡後周改縣曰遠安隋開皇七年郡廢屬峽州唐因之有沮水東南流逕當陽枝江縣入于江謂之沮口

輿地廣記卷第二十七

輿地廣記卷第二十八

荆湖北路下

下岳州古三苗國地春秋戰國屬楚秦屬長沙郡二漢因之晉元康元年置建昌郡咸康元年省宋元嘉十六年置巴陵郡齊梁陳皆因之梁兼置巴州隋平陳郡廢改州為岳州大業初改曰羅州復置巴陵郡唐武德四年平蕭銑置巴州六年改為岳州天寶元年曰巴陵郡 皇朝因之今縣五

上巴陵縣二漢下隽縣地吳為巴丘邸閣晉太康元年置巴陵縣屬長沙郡宋置巴陵郡梁置巴州隋改為岳州唐因之吳使魯肅方或東晉使陶侃皆守巴陵以為重鎮有大江洞庭湖有資水沅水澧水湘水同注洞庭北會大江名之五渚戰國策云秦與荆戰大破之取洞庭五渚謂此也湖水圓廣五百餘里日月若出沒於其中有君山扁山君山即湘山也以

湘君之所遊處因曰君山有石穴與太湖之苞山潛通故太湖亦有洞庭山君山東北對扁山兩山相次去數十里回峙相望孤影若浮有青草湖

望華容縣漢孱陵縣地晉武帝時置安南縣屬安平郡宋因之隋開皇十八年改曰華容屬岳州唐因之垂拱二年更名容城神龍元年復故有方臺山赤亭湖近湖有赤亭城梁元帝使胡僧祐陸法和等據赤亭擊破侯景軍擒其將任約即此上平江縣本漢昌縣地東漢置吳曰吳昌晉宋因之屬長沙郡隋平陳省入羅唐省羅入湘陰神龍三年分湘陰置昌江縣屬岳州後唐改曰平江有汨水西至湘陰入湘有廬水

中臨湘縣本巴陵縣之王朝場 皇朝淳化四年升為王朝

縣至道二年改為臨湘有陵城山大江

中沅江縣漢益陽縣地梁置樂山郡及樂山縣隋平陳郡廢改

縣曰安樂屬岳州十八年改曰沅江唐因之乾寧中改曰橋江五代時屬朗州 皇朝乾德元年復曰沅江來屬有楓山沅水

下歸州春秋為夔子國楚人滅之及戰國皆屬楚秦屬南郡二漢因之吳永安三年置建平郡晉亦為建平郡宋因之後周置秭歸郡隋開皇初郡廢屬信州大業初屬巴東郡唐武德二年分夔州置歸州天寶九年曰巴東郡 皇朝因之今縣三

下秭歸縣故夔子國其先熊摯本楚之嫡嗣以疾不立而封於夔春秋時夔子不祀祝融與鬻熊曰我先君有疾鬼神弗赦而自竄於夔我是以失楚又何祀焉楚人滅之二漢為秭歸縣屬南郡晉宋屬建平郡其地險固孫皓末晉將王濬自蜀泝江伐吳吳守將吾彥表謂皓曰增建平兵若建平不下晉師終不敢過皓不從即秭歸縣界後周置秭歸郡隋郡廢屬

信州唐置歸州縣東南有丹陽城周成王封楚子熊繹始居於此後徙都枝江亦曰丹陽縣北百餘里有楚大夫屈原故宅名曰樂平里原旣被流放忽然暫歸有賢姊曰女湏亦歸喻令自寬離騷所謂女湏之嬋媛兮申申其罵予也袁山松以爲秭歸之名始於此而酈道元引樂緯云昔歸典聲律宋忠注云歸即夔也則知古人通音同字不必因屈原也有空舸峽大江

下巴東縣漢巫陽縣地宋有歸鄉縣屬建平郡初在秭歸之東後徙置於此梁置信陵郡後周郡廢改歸鄉曰樂鄉隋開皇末又改曰巴東屬信州唐武德二年來屬有石門山在大江北岸洞達東西劉備爲陸遜所破走逕北門追者甚急踰山越險僅乃得免遂發憤而薨

下興山縣吳置屬建平郡晉因之宋省焉唐武德三年析秭歸

復置屬歸州 皇朝熙寧五年省入秭歸後復置有古夔子城有昭君村漢宮女王嬙此鄉人也

下辰州古蠻夷地春秋戰國屬楚秦昭襄王三十年取楚巫黔及江南地置黔中郡漢高帝二年改爲義陵郡在辰陽縣界與蠻夷相接數爲所攻破光武時郡治東徙臨沅遂改爲武陵郡而以此地屬焉晉宋齊因之後置沅陵郡隋平陳郡廢置辰州大業初州廢復沅陵郡唐武德四年平蕭銑置辰州天寶元年曰盧溪郡 皇朝因之今縣四

中沅陵縣二漢晉宋齊皆屬武陵郡後置沅陵郡隋置辰州唐因之縣東有壺頭山高一百里圓廣三百里東漢馬援征蠻從壺頭進軍遇瘴沒於此有小酉山沅水酉溪其水東南注于沅謂之酉口

中下淑浦縣本漢義陵縣屬武陵郡東漢省之唐武德五年分

辰溪置淑浦縣屬辰州有淑溪其水出酃梁山西北注于沅
楚詞所謂入淑浦余邇迴兮迷不知吾之所如即此水也最
為沃壤特宜稻焉其城則劉備所築

下辰溪縣二漢辰陽縣屬武陵郡晉省之宋復置屬武陵隋平
陳改曰辰溪屬沅州大業初州廢屬沅陵郡唐屬辰州有五
城山辰溪縣治舊在辰水之北楚詞所謂夕宿辰陽是也

下盧溪縣本沅陵縣地唐武德五年析置盧溪縣屬辰州有武
山武溪所出東南流注于沅水源石上有磐瓠跡猶存盤瓠
者高辛氏之狗啣犬戎吳將軍頭致於闕下帝妻以少女磐
瓠負女入南山上石室中生六男六女自相夫妻後遂滋蔓
今五溪蠻夷即其種也

下沅州古蠻夷地春秋戰國皆屬楚秦屬黔中郡二漢晉宋屬
武陵郡梁陳屬沅陵郡隋屬辰州唐正觀八年以辰州之龍標

縣置巫州天授二年曰沅州開元十三年以沅原聲相近復曰
巫州天寶二年曰潭陽郡大厯五年改為叙州唐襄沒于溪洞
皇朝熙寧七年收復置沅州兼得錦獎二州之地今縣三

下盧陽縣本漢無陽縣地屬武陵郡東漢省之晉宋為舞陽後
省梁置龍標縣屬沅陵郡隋屬辰州唐析龍標置潭陽縣屬
叙州 皇朝熙寧七年以其地置盧陽縣為沅州治焉鎮

江鋪本龍標縣地唐置叙州熙寧五年以其地置寨元豐三
年廢為鋪龍門鋪本龍門縣地唐垂拱四年析麻陽置屬辰
州尋省熙寧七年以其地置鋪獎州鋪唐獎州地也

下麻陽縣唐武德三年分沅陵辰溪置屬辰州熙寧七年來屬
唐招諭縣垂拱三年置屬錦州後省 皇朝太平興國七
年析麻陽復置屬辰州熙寧七年來屬八年省入麻陽故錦
州寨唐錦州地也有辰山辰溪

下黔陽縣本鐔城縣地二漢及晉屬武陵郡宋省焉唐正觀八年置朗溪縣屬叙州後置黔江城 皇朝元豐三年升為

黔陽縣有紫霄山七寶山沅水舞水 皇朝熙寧九年收復仍

下靖州古蠻夷地唐為溪洞誠州 皇朝熙寧九年收復仍

置元祐二年廢為渠陽軍三年廢為寨屬沅州紹聖中復置誠

州崇寧二年改為靖州今縣三 皇朝元豐六年置渠陽縣為

下永平縣本沅州貫保寨地 皇朝元豐六年置渠陽縣為

誠州治崇寧二年改為永平有勝山渠河

會同縣本三江崇寧二年改名

通道縣本羅蒙崇寧二年改名

同下州漢陽軍春秋屬鄭後及戰國屬楚秦屬南郡江漢屬江

夏郡晉宋齊因之梁屬沔陽郡後周屬復州隋屬沔州州廢屬

沔陽郡唐武德四年平朱粲置沔州建中二年州廢四年復置

寶麻二年州又廢屬鄂州周置漢陽軍 皇朝因之熙寧四

年軍廢屬鄂州元祐元年復置今縣二

望漢陽縣本安陸縣地二漢及晉屬江夏郡東晉置沌陽縣宋

因之後省隋開皇十七年置漢津縣屬復州大業初改曰漢

陽唐屬沔州州廢屬鄂州周置漢陽軍 皇朝因之有魯

山大江漢水沌水澚水漢入江處謂之沔口漢末魏及吳人

-5 270 45 905" data-label="Text">

皆以為重鎮禹貢漢水至于大別南入于江今縣蓋古大別

-55 270 105 905" data-label="Text">

之地也

-105 270 155 905" data-label="Text">

下漢川縣本安陸縣地梁置梁安郡西魏改曰魏安郡尋改曰

-155 270 205 905" data-label="Text">

汶川郡隋開皇初郡廢唐武德四年析漢陽置汶川縣屬沔

-205 270 255 905" data-label="Text">

州州廢屬鄂州周屬安州 皇朝太平興國二年改曰漢

-255 270 305 905" data-label="Text">

川屬漢陽軍亦周隋甌山縣地

-305 270 355 905" data-label="Text">

同下州荆門軍五代以前地理與江陵府同 皇朝開寶五

-355 270 405 905" data-label="Text">

也

-405 270 455 905" data-label="Text">

也

-455 270 505 905" data-label="Text">

五

-505 270 555 905" data-label="Text">

五

年置荆門軍熙寧六年廢元祐元年復置今縣二

中長林縣本編縣地二漢晉宋皆屬南郡後廢焉而置長林長寧二縣隋開皇十一年省長林入長寧十八年改長寧曰長林屬江陵府唐武德四年於縣東北置基州及章山縣七年州廢以章山隸郢州郢州廢來屬八年省入長林正元二十一年析置荆門縣後省 皇朝置荆門軍軍廢屬江陵府後復置皆為軍治有章山禹貢所謂內方也有漢水漳水漕水

下當陽縣二漢晉宋齊梁屬南郡後周置平州屬梁蕃隋開皇七年改為玉州九年州廢屬江陵府梁又置安居縣十八年改曰昭仁大業初改曰荆臺尋省入當陽唐武德四年復置平州六年改曰玉州八年州廢屬荊州 皇朝置荆門軍初治此後徙治長林軍廢屬江陵府後復置來屬二漢臨沮

縣屬南郡晉屬襄陽郡宋復屬南郡後省唐武德四年析當陽復置屬平州八年省入當陽縣有綠林山在縣東即所謂當陽長阪也曹公追劉備而張飛橫矛拒之於此有麥城關羽保麥城詐降而遁焉為潘璋所斬有沮水漳水皆東南流入于江而麥城在二水間王粲於此登樓而賦之曰夾清漳之通浦倚曲沮之長洲是也

荆湖北路化外州

下錦州歷代地理與辰州同唐垂拱二年析辰州麻陽縣地及開山洞置錦州天寶元年曰盧陽郡統縣五

中下盧陽縣

中下涇陽縣

中下招諭縣今省入沅州麻陽

中下常豐縣本萬安縣天寶元年更名

中下洛浦縣天授二年析辰州之大鄉置屬溪州後來屬

下獎州歷代地理與辰州同唐天授二年析沅州之夜郎渭溪二縣置舞州開元十三年以舞武聲相近更名鶴州二十年曰業州天寶元年曰龍溪郡大曆五年改爲獎州統縣三

中下峩山縣本夜郎天寶元年更名

中下渭溪縣天授二年析夜郎置

中下梓薑縣本屬充州天寶三年廢爲羈縻州以縣來屬

下溪州歷代地理與辰州同唐天授二年析辰州之大鄉置天寶元年曰靈溪郡統縣二

上大鄉縣漢沅陵零陽二縣地屬武陵郡梁置大鄉縣屬沅陵郡隋屬辰州唐置溪州以五溪相會此地故以爲名

中下三亭縣正觀九年析大鄉置有黔山大酉山

輿地廣記卷第二十八

成都府路上

次府成都府自三代以前爲蜀國其君曰蠶叢曰伯雍曰魚鳧曰杜宇曰開明相繼王之周武王伐商蜀人從焉牧誓所謂庸蜀是也秦惠王時巴蜀相攻惠王乃使張儀司馬錯等伐蜀取之置蜀郡西漢因之蜀王本治廣都樊鄉儀既平蜀乃自赤里街移治於少城儀所築也謂之龜城至昭王時李冰爲蜀守穿二江行成都中以灌溉土田蜀由此爲沃野蜀人始未知學漢景帝時文翁爲蜀守乃立學官教民以經術文藝於是蜀之學者比齊魯焉武帝置益州以統之王莽敗公孫述據蜀光武遣吳漢討平之亦爲蜀郡東漢末劉焉爲益州牧始自廣漢之雒移治於成都其子璋爲劉備所取據其地魏咸熙中遣鄧艾伐取之晉武帝改爲成都國尋復置蜀郡兼爲益州刺史治惠帝



之末李特僭號於蜀後桓溫滅之其地復為晉有安帝時譙縱又竊據之為朱齡石所滅宋及齊梁皆因晉舊後周令尉遲迴克而有之州郡復因梁焉隋開皇初郡廢大業初復置唐武德初改為益州天寶元年又改為蜀郡十五載明皇幸蜀駐蹕成都至德二年駕迴秦京乃改蜀郡為成都府又分為劔南西川節度唐末王建據之而滅於後唐孟知祥又據之 皇朝乾德三年王師克蜀太平興國六年降為益州端拱元年復升成都府劔南西川淳化五年復為益州嘉祐四年復升為府六年復為劔南西川今縣九

次赤成都縣在府西古蜀國也秦既平蜀張儀築成都以象咸陽為蜀郡治西漢因之漢末又為益州刺史治焉晉宋齊梁陳皆因之唐為成都府治成都舊謂之錦官城言官之所織錦也亦猶合浦之珠官云又或名之曰錦里城北有升仙橋

蜀人司馬相如將入長安題其柱曰不乘高車駟馬不過汝下後奉使歸蜀果如志焉李冰泐水造橋上應七星曰冲理橋曰市橋曰江橋曰萬里橋曰笮橋曰永平橋曰長升橋吳漢伐公孫述光武謂漢曰安軍宜在七星間蓋謂是也沱江鎮以沱水之所經為名禹貢言岷山導江東別為沱而爾雅亦言江有沱凡江之別出者皆曰沱非獨此有之故禹治水於荊州之域亦曰浮于江沱潛漢也武檐山蜀王紀云武都山精化為女子蜀王納以為妃妃死王憐之令五丁力士檐土於成都為冢以葬妃故曰武檐今山上有石照存焉

次赤華陽縣在府東本成都縣地唐正觀十七年析置蜀縣乾元元年更名華陽昔人論蜀之繁富曰地稱天府原號華陽故晉常據作蜀書誦之華陽國志縣之得名實本諸此府學有石室漢蜀守文翁興學後人作石室以奉祠之

次畿新都縣漢舊縣也故城在今縣東屬廣漢郡晉置新都郡於雒而以縣屬焉隋開皇十八年改新都縣曰興樂大業初省興樂入成都唐武德二年復置新都縣屬益州

次畿郫縣漢舊縣也故城在今縣北屬蜀郡晉宋齊梁周隋皆因之唐屬益州蜀王杜宇號曰望帝都郫有墓在焉犀浦鎮本成都縣地唐垂拱二年析置犀浦縣屬益州秦時李冰作石犀五以厭水精穿石犀渠於南江命之曰犀牛里縣取此以為名耳不在其地也 皇朝熙寧五年省為鎮入郫縣

次畿雙流縣本漢廣都縣後置寧蜀郡後周郡廢屬蜀郡隋仁壽元年以太子名廣故改曰雙流唐屬益州秦時李冰穿二江行成都中故左思蜀都賦去帶二江之雙流按外江在今羅城之南笮橋下內江在今子城之南眾安橋下自唐乾符中高駢築羅城遂作糜棗堰轉內江水從城北流又屈而南

與外江水合故今子城之南不復成江然則二江雙流未嘗歷此縣之境特取蜀中事而名之耳

次畿溫江縣本郫縣地西魏析置溫江縣隋開皇初省入郫仁壽初復置方春縣大業初又省唐武德三年復置萬春縣屬益州正觀元年更名溫江有新源水開元二十三年長史章仇兼瓊因蜀王秀故渠益開通之以漕西山竹木

次畿新繁縣漢曰繁縣屬蜀郡晉因之唐為新繁屬益州次畿廣都縣本漢舊縣地隋既改廣都曰雙流唐龍朔二年又析雙流置廣都縣屬益州

次畿靈泉縣本漢成都縣地唐又視元年析蜀縣置東陽縣屬益州天寶元年更名靈池 皇朝天聖四年改曰靈泉

上眉州秦屬蜀郡漢屬犍為郡晉宋皆因之齊置齊通郡梁及後周皆因之隋開皇初廢齊通入眉山郡唐武德二年析嘉州

置眉州天寶元年改為通義郡後復為眉州 皇朝因之統縣四

望眉山縣本漢武陽縣地後分置齊通縣為齊通郡治梁及後周皆因之隋開皇初郡廢改齊通曰廣通仁壽元年改為通義唐置眉州 皇朝太平興國元年改為眉山按西魏置

眉州隋置眉山郡皆在今嘉州其後州縣之名遷於此耳

望彭山縣本漢武陽縣屬犍為郡東漢為郡治焉晉因之後郡遷于犍道乃改武陽為犍為縣置江州西魏改縣曰隆山以縣有鼎臯山地形隆起故也後周省州置隆山郡隋開皇初屬陵州唐正觀元年省隆山入通義二年復置來屬先天元年改為彭山取彭女山為名有彭亡聚相傳彭祖亡於此後漢岑彭伐公孫述次其地惡之會夜不及徙營果為述刺客所殺黃龍鎮在赤水口漢末黃龍見于武陽赤水劉先主以

為受命之祥

望丹稜縣南齊置齊樂縣後周因之隋開皇初改曰丹稜屬嘉州唐武德二年來屬

望青神縣本漢南安縣地後周置青神縣及青神郡隋開皇初郡廢屬嘉州唐武德二年來屬舊治思濛水口八年移於今治昔蠶叢氏衣青衣以勸農桑縣蓋取此為名

緊蜀州秦二漢屬蜀郡晉永和桓溫平蜀置晉原郡宋齊屬晉康郡後周廢隋屬蜀郡唐垂拱二年析置蜀州天寶元年曰唐安郡 皇朝因之今縣四

望晉原縣本漢江原縣屬蜀郡李雄據蜀置江原郡桓溫克之置晉原郡縣為多融後周郡廢改縣為晉原隋屬蜀郡唐垂拱二年置蜀州

望新津縣本漢武陽縣地後周置新津縣以為犍為郡治焉隋

開皇初郡廢屬蜀郡唐垂拱二年來屬有天社山通濟堰自
邛江口引渠南下百二十里至眉州西南入江溉田千六百
頃唐開元二十八年採訪使章仇兼瓊開

望江原縣本漢江原縣地後魏置熒道縣大業初省入新津唐
武德二年復置唐隆縣屬益州垂拱二年來屬長壽二年改
曰武隆神龍元年復曰唐隆先天元年更名唐安後又曰唐
興 皇朝開寶四年改唐興曰江原

望永康縣本青城縣之橫渠鎮孟蜀廣政中置永康縣屬蜀州
有天國山

緊彭州秦二漢及晉屬蜀郡桓温平蜀置寧蜀郡梁置東益州
西魏置天水郡後周州廢置九隴郡隋開皇初郡廢仁壽初置
濛州大業初州廢屬蜀郡唐武德三年復置濛州正觀三年又
廢垂拱二年置彭州以天彭山為名漢湍氏道有天彭山兩山

相對其形如闕謂之天彭門亦曰天彭闕江水逕其間今在茂
州特取其名耳天寶元年曰濛陽郡 皇朝因之今縣三

望九隴縣本漢繁縣地晉置晉壽縣後周改為九隴及置九隴
郡隋屬蜀郡唐置彭州武后時益州長史劉易從決唐昌沱
江鑿川派流合壩口琅岐水溉九隴唐昌田民為立祠有九
隴山

望崇寧縣唐儀鳳二年析九隴導江郫縣置唐昌縣屬益州垂
拱二年來屬長壽二年改為周昌神龍初復故名 皇朝
開寶四年改為永昌崇寧中改為崇寧

望濛陽縣唐儀鳳二年析九隴什邽雒縣置屬益州垂拱二年
來屬有沱濛水

上綿州秦屬蜀郡漢屬廣漢郡晉宋齊屬梓潼郡後置巴西郡
西魏兼置潼州隋開皇初郡廢改潼州曰綿州以綿水為名大

業初州廢置金山郡唐武德元年復為綿州天寶元年曰巴西郡

望巴西縣本漢涪縣屬廣漢郡後漢伐公孫述裨將臧宮進破涪城斬公孫恢即此西魏改涪曰巴西隋置金山郡唐置綿州有涪水

望彰明縣本漢涪縣地後置漢昌縣西魏改為昌隆隋屬金山郡唐屬綿州先天元年改曰昌明後唐改曰彰明有涪水有唐李白碑白之先世嘗流雋州其後內移白生於此縣

緊魏城縣本漢涪縣地西魏置隋屬金山郡唐屬綿州

緊羅江縣本漢涪縣地後置孱亭縣西魏改為萬安及置萬安郡隋開皇初郡廢屬金山郡唐屬綿州天寶元年改為羅江按水經注潺水出潺山水源有金銀歷潺亭而下注涪水今羅江即古之潺亭則羅江水亦古所謂潺水歟有羅墳化江

因以為名

上神泉縣本漢涪縣地後置西充國隋開皇十六年改曰神泉以縣西有泉能愈疾故也屬金山郡唐屬綿州有綿水

上龍安縣本金山縣後周置隋屬金山郡唐屬綿州武德三年更名龍安有龍安山西北有松嶺關西昌鎮本益昌縣隋開皇四年省入金山唐永淳元年復置西昌縣屬綿州

皇朝熙寧五年省為鎮入龍安

中益泉縣唐武德三年析魏城置屬綿州有梓潼水

下石泉縣本漢廣柔縣地屬蜀郡隋為汶山縣地屬汶山郡唐正觀八年析置石泉縣屬茂州

皇朝熙寧九年來屬有石紐山禹之所生也華陽國志去夷人營其地方百里不敢居牧畏禹神靈也

上漢州秦屬蜀郡漢屬廣漢郡東漢為郡治兼為益州刺史治

焉晉置新都郡宋齊為廣漢晉熙二郡隋開皇初郡廢屬蜀郡
唐垂拱二年分置漢州天寶元年為德陽郡 皇朝因之今
縣四

上雒縣漢屬廣漢郡東漢為益州刺史治至劉焉乃徙治成都
晉置新都郡宋齊為廣漢郡隋屬蜀郡唐置漢州洛水出章
山南逕雒縣因取名焉劉備自涪攻雒龐士元中流矢死於
此有嚴君平卜臺

望什邡縣漢屬廣漢郡高帝封雍齒為侯國晉屬新都郡後周
置曰方寧隋省之唐武德二年析雒縣復置什邡屬漢州有
洛通山即古章山也洛水所出

望綿竹縣漢屬廣漢郡故城在縣東晉屬新都郡後置晉熙郡
隋開皇初郡廢為晉熙縣十八年改曰孝水大業三年復曰
綿竹唐武德三年屬濠州正觀二年州廢屬益州垂拱二年

來屬有紫巖山綿水所出孝泉鎮東漢姜詩所居詩至孝母
好飲江水嗜魚膾舍側忽有涌泉常出雙鯉

望德陽縣本綿竹縣地東漢析置屬廣漢郡晉因之後周廢焉
唐武德三年分雒縣復置屬益州垂拱二年來屬魏將鄧艾
自油江出綿竹破蜀將諸葛瞻於此因築京觀有鹿頭關唐
高崇文破劉闢守兵於此有劔閣道三十里至險

上嘉州秦屬蜀郡二漢屬犍為郡晉宋齊梁皆因之西魏置眉
州取峨眉為名後周改曰青州取青衣水為名後又改曰嘉
州取漢嘉郡為名隋大業初置眉山郡唐武德元年復曰嘉州
天寶元年曰犍為郡 皇朝因之今縣五

上龍遊縣本漢南安縣初屬蜀郡故鄧通在文帝景帝時而其
傳去蜀郡南安人也武帝平夜郎置犍為郡乃以南安為之
屬縣焉東漢以後皆因之後周置峨眉縣隋開皇九年改曰

青衣隋軍伐陳有龍見于江引舟而進十年改曰龍遊唐屬嘉州自西魏以來置眉州青州嘉州眉山郡皆治此漢之青衣本屬蜀郡其地於今為雅之廬山名山公孫述據蜀青衣不賓光武嘉之陽嘉二年改曰漢嘉劉先主因置漢嘉郡領漢嘉徙陽嚴道旄牛四縣實今之雅州廬山名山地也青衣水出廬山徼外東南流逕嚴道洪雅夾江至龍遊而與岷江合龍遊居青衣水口有青水山青衣津故前世於是置青州嘉州不知龍遊乃南安故地非青衣漢嘉本土也唐顏師古注漢書彭越傳杜佑述通典嘉州事皆以龍遊為青衣蓋失之矣平羗鎮本漢南安縣地後周置平羗縣及平羗郡隋開皇初郡廢屬眉山郡 皇朝熙寧五年省入龍遊有熊耳峽諸葛忠武鑿山開道蓋今湖漫峽云

上洪雅縣後周洪雅鎮隋開皇十三年置縣屬眉山郡唐武德

元年置犍州正觀元年州廢屬眉州開元七年置義州并以獠戶置南安平鄉二縣八年州廢省二縣以洪雅屬眉州 皇朝淳化四年來屬

中夾江縣本漢南安縣地隋開皇三年析龍遊平羗置屬眉山郡唐屬嘉州舊治涇上武德元年移於今治

中峨眉縣本漢南縣地隋開皇十三年置屬眉山郡唐屬嘉州有峨眉山大渡河綏山鎮隋招致生獠於榮樂城置綏山縣取旁山以為名唐屬嘉州 皇朝乾德四年省入峨眉

下犍為縣本武陽縣後周置隋開皇初改曰犍為屬戎州唐上元元年來屬其後遂以嘉州為犍為郡按漢武帝開夜郎置犍為郡因山立名初治營縣其地蓋在今瀘南徼外後徙治犍道今戎州是也東漢及晉徙治武陽今眉州彭山是也始雖因平夜郎以置犍為然郡之北境大半本巴蜀舊縣如南

安武陽牛鞞資中江陽棘道是也而漢史地理志夜郎縣乃屬牂柯郡則知今嘉州非夜郎故也夜郎蓋於今為珍播等州人徒見嘉州號犍為郡及領犍為縣遂以為本夜郎因杜佑述通典亦承誤焉郡之東山有大石雙峙說者以為唐蒙開夜郎立此石闕以表之抑又妄矣

上邛州秦屬蜀郡二漢及晉皆因之宋齊屬晉康郡梁置邛州西魏因之及置臨邛郡隋開皇初郡廢大業初州廢屬臨邛郡唐武德元年置邛州天寶元年曰臨邛郡今縣六

望臨邛縣漢晉屬蜀郡西魏置臨邛郡隋開皇初郡廢唐顯慶二年邛州自依政徙治焉漢司馬相如酤酒令文君當壚相如滌器於市中即此臨溪鎮本臨邛縣地西魏分置臨溪縣隋省之唐復置屬邛州 皇朝熙寧五年省入臨邛

望依政縣本臨邛縣地梁置邛州西魏因之及置依政縣隋大業

初州廢唐初邛州治此後徙治臨邛

望安仁縣唐武德三年析臨邛依政置屬邛州正觀十七年省咸亨元年復置有斜江水

望大邑縣唐咸亨二年析益州之晉原置屬邛州有鸛鳴山後漢張道陵隱居于此著作符書有斜江水

上蒲江縣本臨邛縣地西魏置廣定縣及蒲原郡隋開皇初郡廢仁壽初改廣定曰蒲江屬臨邛郡唐曰蒲江屬邛州有蒲江水

中火井縣本臨邛縣地後周置火井鎮隋末并為縣唐屬邛州有火井舊說云欲出其火先以家火投之須臾隆隆如雷聲爛然通天光曜十里左思蜀都賦云火井沉熒於幽泉高焰飛煽於天垂今無復見矣有邛池李膺記曰臨邛老姥得水蛇飼之漸長文餘後姥為令所殺蛇見夢於令曰我當報仇

是夜四十里俱陷為湖按陷池在邛都今為化外雋州非臨邛也

輿地廣記卷第二十九

輿地廣記卷第三十

成都府路下

上黎州漢屬蜀越雋二郡晉時李特據蜀置漢源郡後周置黎州隋仁壽初置登州大業初州廢唐武德元年復置九年又廢大足元年置黎州神龍三年州廢開元四年復置天寶元年曰洪源郡後曰漢源郡今縣一

下漢源縣本嚴道縣地李特置漢源郡桓温平蜀廢之隋大業初置漢源縣屬臨邛郡唐武德四年置登州九年州廢屬雅州正觀二年屬雋州永徽三年復故大足元年置黎州取古沉黎郡為名有邛峽九折坂漢王陽為益州刺史行部至此嘆曰奉先人遺躅奈何數乘此險後王尊為刺史至坂叱其馭曰驅之王陽為孝子王尊為忠臣漢源鎮本縣所治後徙治於州郭而以故縣為鎮通望鎮本陽山縣唐武德元年析

嵩州之臺登置屬登州九年州廢屬雅州正觀二年屬嵩州
大足元年屬黎州天寶元年改曰通望 皇朝慶祿七年
省入漢源故飛越縣唐儀鳳二年析漢源置以飛越山為名
初屬雅州後屬黎州五代之際省入漢源按沉黎郡本祚都
地漢武帝開之置郡既而罷之李特據蜀復置沉黎郡桓溫
平蜀廢宋齊以來復置後周置黎州及沉黎郡尋並廢隋開
皇初置沉黎縣仁壽初置登州大業初州廢後縣亦省其地
在今化外嵩州之域所謂古沉黎城是也

上雅州秦屬蜀郡西漢因之東漢為蜀郡屬國劉備置漢嘉郡
晉因之永嘉後亂離此地蕪廢西魏開生獠置蒙山郡隋初郡
廢置雅州煬帝初州廢置臨邛郡唐復曰雅州天寶元年曰盧
山郡今縣五

中嚴道縣漢屬蜀郡漢制縣有蠻夷曰道晉屬漢嘉郡西魏置

始陽縣及蒙山郡隋開皇初郡廢十三年改始陽曰蒙山尋
置雅州大業初置臨邛郡改蒙山縣曰嚴道唐復曰雅州有
蔡山禹貢所謂蔡蒙旅平是也今日周公山始陽鎮本漢徙
縣屬蜀郡晉曰徙陽屬漢嘉郡西魏曰始陽唐以為鎮

上盧江縣本漢青衣縣地屬蜀郡隋置盧山鎮仁壽末升為縣
屬臨邛郡唐屬雅州儀鳳二年析置大渡縣長安二年省靈
關寨本漢靈關道屬越雋郡後廢唐初置靈關縣武德六年
省晉左思蜀都賦玄廓靈關而為門謂此也

中名山縣本漢青衣縣地西魏置蒙山縣隋開皇十三年改始
陽曰蒙山而改蒙山曰名山屬臨邛郡唐屬雅州漢彭越徙
蜀青衣蓋在此也有禹貢蒙山

中百文縣唐武德中置百文鎮正觀八年升為縣屬雅州有百
文山

中下榮經縣本嚴道縣地晉屬漢嘉郡唐武德三年置榮經縣屬雅州有邛崃山漢淮南厲王徙嚴道邛郵即此有故銅山漢文帝賜鄧通嚴道銅山得自鑄錢蓋此山也

上茂州本冉駹國漢武帝開其地置文山郡尋罷屬蜀郡東漢靈帝時復置汶山郡晉宋齊皆因之梁置繩州及北部郡後周改繩州曰汶州隋初郡廢改汶州為蜀州尋改曰會州大業初州廢復置汶山郡唐武德元年復曰會州四年曰南會州正觀八年更名茂州取茂濕山為名天寶元年曰通化郡今縣二下汶山縣本漢汶江湍氏三縣地文山郡治焉故城在今縣北二里郡罷屬蜀郡後復置汶山郡及汶山縣晉因之宋曰廣陽縣梁置北部郡開皇初郡廢屬會州仁壽元年復改廣陽曰汶山唐置茂州禹貢岷山在西北俗謂之鐵豹嶺禹之導江發跡於此河圖括地象曰岷山之精上為井絡帝以會昌

神以建福故泉流深遠為四瀆之首

下汶川縣本漢綿虎廣柔二縣地初屬汶山郡尋屬蜀郡晉屬汶山郡後周置汶川縣及汶山郡隋開皇初郡廢屬會州唐屬茂州 皇朝熙寧九年即縣治置威戎軍使有玉壘山與導江相連湍水所出

下簡州秦屬蜀郡漢屬犍為郡東漢及晉皆因之宋齊屬蜀郡西魏置資州及武康郡後周移州治資中隋置簡州以賴簡池為名煬帝初州廢併其地入蜀郡唐武德三年後置簡州天寶元年曰陽安郡今縣二

上陽安縣本漢牛鞞縣屬犍為郡東漢及晉皆因之西魏改牛鞞為陽安置武康郡隋開皇初郡廢仁壽初置簡州大業初州廢唐復置

中平泉縣本漢牛鞞縣地西魏置婆閏縣隋開皇十八年更名

屬蜀郡唐屬簡州貴平鎮本漢廣都縣地西魏置貴平縣及和仁郡隋開皇初郡廢屬陵州唐因之 皇朝熙寧五年省入平泉

下威州蓋古丹駝國漢武帝開之屬文山郡蜀劉禪時姜維馬忠等討汶山叛羗即此地也唐武德七年白狗羗降附乃於姜維故城置維州領金山定康二縣正觀元年羌叛州縣俱罷二年復立維州移治於姜維城東麟德二年自羈縻州為正州天寶元年曰維川郡廣德元年沒吐蕃初吐蕃已陷河西隴右更欲圖蜀川累攻維州不下乃以婦人嫁維州門者二十年中生二子及蕃兵攻城二子內應城遂陷吐蕃得之號無憂城韋臯在蜀收復不克大和中守將悉怛謀以州歸唐李德裕受之而為牛僧孺所沮復棄其地大中三年杜悰鎮蜀吐蕃亂離首領內附乃復屬西川 皇朝景祐三年以京迤發維州斷獄文

書誤至維州因改曰威州謂唐置此州以威制羗戎故也今縣二

下保寧縣本薛城隋初蜀師討叛羗以其地置薛城成大業末沒於羗唐武德元年置維州正觀二年自姜維故城徙州治此及置薛城縣後改曰保寧有沱水自羈縻悉州流出東逕保寧又東逕棋春又東逕通化又東逕嘉會又東至汶州與大江合

下通化縣本漢廣柔縣地隋開皇初置金川縣仁壽初改曰通化屬汶山郡後廢焉唐咸亨二年以生羗戶置小封縣後復改曰通化屬茂州後屬維州 皇朝天聖元年改曰金川景祐四年復舊治平三年即縣治置通化軍使縣在保霸二州之間

棋州唐開元二十八年以維州之定康縣置奉州及雲山郡天

寶八年徙治天保軍更郡名曰天保郡廣德元年沒吐蕃乾元元年嗣歸誠王董嘉俊以州來歸更州名保州以嘉俊為刺史又更曰古州其後復曰保州領縣四曰定廉本隋定廉鎮後沒於羗武德七年招白狗羗置曰歸順曰雲山皆天寶八年析定廉置曰安居沒蕃後縣皆廢准首領董氏世襲刺史羗於威州 皇朝政和四年刺史董氏入朝以其地置祺州今縣一春祺縣本定廉縣地 皇朝政和四年置
亨州漢為廣柔縣地屬蜀郡晉屬汶山郡唐天寶元年招附生羗置霸州及靜戎郡領縣四曰安信曰牙利曰保寧曰歸化廣德元年沒吐蕃後縣皆廢首領董氏歸附世襲刺史羗於威州 皇朝政和四年刺史董氏入朝以其地置亨州今縣一嘉會縣本信安縣地 皇朝政和四年置舊保霸二州在威州之裏名為羗縻而據吾腹脅不與它等雖受爵命而猶以

蕃夷自待恭順之心未能純壹徃徃多幸生羗擾攘藉已與之和好因挾以自重而邀厚賞近緣二酋挈籍自獻於是詔令建築郡邑置吏以治之無亡矢遺鏃之費而土為王土民為王民自茂如威不涉異域有父逸永寧之道焉

同下州永康軍自秦至隋屬蜀郡唐屬彭蜀二州 皇朝乾

德四年置永康軍治導江之灌口鎮熙寧五年軍廢元祐初復置今縣二

望導江縣本漢郿綿虎二縣地屬蜀郡蜀置都安縣屬汶山郡後周改都安曰汶山隋改廣陽曰汶山在茂州郭下而此縣廢舊治灌口唐武德元年以其地置盤龍縣尋更名曰導江移於今治屬益州三年屬濠州正觀元年州廢屬益州後改曰灌寧垂拱二年屬彭州開元中復為導江 皇朝乾德四年來屬而以灌口為軍治熙寧五年軍廢復屬彭州元祐

初來屬有玉壘山與汶州相連左思蜀都賦所謂包玉壘而為宇是也有蠶崖關以扼西山之走集秦時蜀守李冰作大堰於江以溉諸縣作三石人於白沙郵立水中刻字為約口水竭不至足盛不沒膏是以蜀人不知飢饉沃野千里世號陸海有廣濟王廟所以祠水也

望青城縣本漢江源縣地後置齊基郡後周郡廢改曰青城縣隋屬蜀郡唐垂拱二年屬蜀州開元十八年去水作青城皇朝乾德四年來屬熙寧五年軍廢復屬蜀州元祐初來屬有青城山

同下州仙井監秦屬蜀郡二漢屬犍為郡晉及宋齊皆因之梁置懷仁郡後周置陵州取陵井為名隋置隆山郡唐武德元年復為陵州天寶元年曰仁壽郡皇朝熙寧五年廢為陵井監政和三年改為仙井今縣二

望仁壽縣漢武陽縣地晉置西城戍以為鹽井之防梁置懷仁郡西魏改西城戍置普寧縣隋開皇初郡廢十八年改普寧為仁壽縣大業初置隆山郡唐為陵州有陵井東漢張道陵所開有毒龍藏井中及鹽神玉女十二為崇天師以道力駢出毒龍禁玉女於井下然後人獲鹹泉之利皇朝不欲斥天師名故改陵井為仙井有天師廟今為至道觀有玉女祠今號靈真夫人

中下井研縣漢武陽縣地東漢置西陽郡西魏置蒲亭縣隋改為井研屬隆山郡唐屬陵州始建鎮隋開皇十一年置縣隸陰山郡唐屬陵州皇朝咸平四年省入井研

成都府路化外州

下都督府松州本諸羌之地後周置扶州及龍涸郡隋隸同昌汶山二郡唐武德元年置松州以地產甘松為名天寶元年曰

交川郡東至扶州南至翼州西北接吐蕃領縣四

下嘉誠縣後魏時白水羌豪舒治據此地其子舒彭遣使朝貢乃封為甘松縣子始置甘松縣魏亂又絕後周復招慰之天和六年置扶州領龍涸郡隋開皇三年郡廢而州徙治于同昌改甘松縣為嘉城屬同昌郡唐置松州有甘松嶺江水之所發源也

下交川縣隋開皇初置屬汶山郡唐武德元年來屬

下平唐縣唐垂拱元年析交川及當州之通軌翼針置屬當州天寶元年來屬

下鹽泉縣

下當州本諸羌之地後周置覃州及覃川榮鄉二郡隋開皇初郡廢四年州廢屬汶山郡唐正觀二十一年析松州置當州以地產當歸為名天寶元年曰江源郡東至翼州南至翼水縣東

北至松州西北接生羗領縣三

中下通軌縣後周置隋屬汶山郡唐屬松州正觀中羗酋董和那蓬固守松州有功於是析松州之通軌置當州以和那蓬為刺史後其子屈寧襲焉

下利和縣顯慶二年析通軌置

下谷和縣文明元年開生羗置

下悉州本生羗之地後周置廣年左封二郡隋開皇初並廢屬汶山郡唐顯慶元年析當州置悉州以悉唐川為名天寶元年曰歸誠郡東南至翼州西北至當州領縣二

中左封縣本廣年後周置隋仁壽初改曰左封屬汶山郡唐武德元年屬翼州正觀二十一年屬當州顯慶元年生羗首領董係北射內付乃以左封置悉州并置悉唐識曰二縣治悉唐以係北射為刺史咸亨二年徙治左封而以悉唐置靜州

下歸誠縣垂拱二年析左封置

下靜州本諸羗之地唐置悉州後州徙焉儀鳳二年置南和州天授二年改為靜州天寶元年曰靜川郡東至悉州南至威州西至平戎城北至當州領縣三

中悉唐縣唐顯慶元年置為悉州治焉咸亨元年悉州徙治左封而以悉唐置翼州都督府儀鳳元年翼州還治翼針乃於悉唐置南和州後改曰靜州

中靜居縣有靜川州縣所以取名也

下清道縣

下恭州本諸羗之地唐為廣平縣屬靜州開元二十四年分置恭州天寶元年曰恭化郡東至柘州南至威州北至吐蕃白崖鎮領縣三

下和集縣本廣平縣屬靜州開元二十四年置恭州天寶元年

改曰和集

下博恭縣開元二十四年析廣平置

下烈山縣開元二十四年析廣平置

下柘州本諸羗之地唐顯慶三年開置天寶元年曰蓬山郡東至靜州南至威州北至恭州松嶺鎮領縣二

下柘縣

下喬珠縣

下翼州本漢螭陵縣地屬文山郡郡廢屬蜀郡晉復屬汶山郡

後周置翼針縣及翼針郡隋開皇初郡廢屬會州後屬汶山郡

唐武德元年析置翼州天寶元年曰臨翼郡東至石泉縣南至

茂州西至悉州北至松州領縣三

下衛山縣本翼針天寶元年更名

下翼水縣後周置曰龍求及置清江郡隋開皇初郡廢改縣曰

清江十八年又改曰翼水漢螽陵縣故城在今縣西

下峨和縣

下真州本隋翼水縣地唐屬翼州天寶五載析置昭德郡乾元元年改曰真州領縣四

中下真符縣天寶五載析雞川昭德二縣置以為州治

中下雞川縣先天元年析翼水縣開生獠置屬悉州天寶元年屬翼州五載來屬

下昭德縣本識曰縣顯慶元年開生獠置屬悉州天寶元年屬翼州改曰昭德五載來屬

中下昭遠縣

下乾州本諸羗之地唐大曆三年開西山置領縣二

下招武縣

下寧遠縣

下姚州本南夷故滇池國漢武帝開之置益州郡東漢分益州置永昌郡蜀劉氏分永昌置建寧郡又分永昌建寧置雲南郡晉及宋齊皆因之兼置寧州西魏周隋不能遠有唐武德四年安撫大使李英奏置姚州於漢之雲南故地以此川內人多姚姓因以為名麟德元年徙州治於弄棟川雲南郡後南詔蠻閣羅鳳舉攻殺雲南太守張虔陀自是姚州沒於南詔自嵩州南至西瀘經陽蓬鹿谷菁口會川四百五十里至瀘州乃南渡瀘水經哀州微州三百五十里至姚州州西距南詔羊苴咩城三百里領縣三

下姚城縣故漢弄棟縣地

下瀘南縣本長城垂拱元年置天寶初更名

下長明縣

中都督府嵩州本南夷故邛都國漢武帝開之置越嵩郡東漢

晉宋皆因之後周置嚴州隋開皇六年改曰西寧州十八年又改曰雋州大業初復置越雋郡唐武德元年改曰雋州至德二載沒吐蕃正元十三年節度使韋臯以兵收復之本治越雋縣大和五年為蠻寇所破六年李德裕徙州治臺登縣南至姚州北至黎州領縣九

中臺登縣漢屬越雋郡有孫水司馬相如檄文所謂梁孫源是也晉因之一名白沙江後周置白沙郡隋開皇初郡廢屬越雋郡唐為郡治

中越雋縣本漢邛都縣地為越雋郡治焉後置越雋縣

中邛都縣本漢蘭縣屬越雋郡後周置邛都縣及邛都郡隋開皇初郡廢來屬

中蘇祈縣本漢蘇示縣屬越雋郡後周平南夷於故城復置及置亮善郡隋開皇初郡廢來屬

中西瀘縣本邛都縣地梁置可泉縣及宣化郡隋開皇初郡廢來屬唐天寶元年改可泉曰西瀘

中昆明縣本漢定祚縣屬越雋郡後周置定祚鎮唐武德二年改為昆明縣昆明在雋之西南今羈縻南寧州諸爨所居是也

中和集縣唐正觀八年置

中昌明縣唐正觀二十二年開松外蠻置牢州及松外尋聲林開三縣永徽三年州廢省三縣入昌明

中會川縣本邛都縣唐上元二年徙治會川因更名有瀘津關瀘水出曲羅東下三百里始曰瀘水兩峯有殺氣暑月舊不行故諸葛亮表言五月渡瀘深入不毛也其水下合繩水若水孫水淹水逕馬湖摠曰馬湖江東北至叙州與岷江合

